

बुद्धिचें जाणणें । कहिं चि न वचे जेयाचेनि आंमणें ।
 साद हि अंतःकरणें । करवे चि ना ॥ ७७ ॥
 तेथ डोलेयां देखि होआवी । हे गोठि काइसेया करावी ।
 किबहुना पूर्वी । दृष्ट ना श्रुत ॥ ७८ ॥
 तें हें विश्वरूप आपुलें । तुम्हीं मज जी दाविलें ।
 तरि माझें मन जालें । दृष्ट देवा ॥ ७९ ॥
 परि आतां ऐसी चाड जीवि । जे तुजसिं गोठि करावी ।
 जबलिक हे भोगावी । आळिगुनि तूतें ॥ ८० ॥
 तें इये चि रूपिं करूं म्हणिजे ।
 तरि कवणें एके मुखेंसि चावलिजे ।
 आणि कोणा खेवं देइजे ।
 तुज लेख नाहिं ॥ ८१ ॥
 म्हणौनि वारेया सवें धावणें । न घडे गगना खेवं देणें ।
 जळकेळि खेलणें । समुद्रीं केउती ॥ ८२ ॥
 एया लागि देवा । येथ भय उपजतसे जीवा ।
 म्हणौनि येतुला लला पालावा । तरि पुरे हें आतां ॥ ८३ ॥
 पै चराचर विनोदें पाहिजे । मग तेणें सुखें घरीं राहिजे ।
 तैसें चतुर्भुजरूप तूझें । तो विसांवां आह्मां ॥ ८४ ॥
 आह्मीं योगजात अभ्यासावें । तेणें यया चि अनुभवा यावें ।
 शास्त्रातें ओलाडावें । परि सिद्धांतु तो हा चि ॥ ८५ ॥
 आक्षि यजनें कीजतु सकलें । परि तियें फलाविं येणें चि फलें ।
 तीर्थें होतु केवलें । यया चि लागि ॥ ८६ ॥
 आणिक ही काहिं जे जे । दानपुण्य आह्मीं कीजे ।
 तैया फलरूप तूझें । चतुर्भुजां चि होआवें ॥ ८७ ॥
 ऐसी तेथिची जी आवडी । तें देखावेया वावडी ।
 वर्तत असे सांकडी । फेडीं वेगां ॥ ८८ ॥

आगा जीविचें जाणतेया । सकल विश्व वसवितेया ।
प्रसन्न होई पूजितेया । देवांचिया देवा ॥ ८९ ॥

किरीटिनं गद्गिनं चक्रहस्त

मिच्छामि त्वां द्रष्टुमहं तथैव ।

तेनैव रूपेण चतुर्भुजेन

सहस्रबाहो मय विश्वमूर्ते ॥ ९० ॥

कैसीं नीलोत्पलातें रावित । आकाशा रंगु लावित ।

तेजाचीं वोज दावित । इंद्रनील ॥ ९० ॥

जैसा परिमलु जालां मरगजा ।

कां आनंदासि निगालिया दोनि भुजा ।

एणें आववेनि मकरध्वजा ।

जोडली बरव ॥ ९१ ॥

मस्ताकिं मुकुटा ठेविलें । किं मस्तक मुगुटु जालें ।

श्रिंगारें लेणें लाधलें । आंगाचें जेया ॥ ९२ ॥

इंद्रधनुखाचिये आडणी । माझि मेघ गगनरंगणी ।

तैसें आवरलें सारंगपाणी । वैजयंतिया ॥ ९३ ॥

कवणि ते उदार गदा । करी असुरां कैवल्याचा धोंदा ।

कैसें चक्र हान गोविंदा । सौम्य तें ॥ ९४ ॥

किंबहुना स्वामी । तें देखोवेया उत्कंठ मी ।

ह्मणौनि झडकरुनि तुझीं । तैसें चि होआवें ॥ ९५ ॥

हे विश्वरूपाचे सोहले । भोगूनियां निवाले डोले ।

आतां होताति आंधले । कृष्णालागि ॥ ९६ ॥

तें साकार कृष्णरूपडें । वांचूनि पाहों आन नावडे ।

तें नेदखतां थोडें । मानिताति हे ॥ ९७ ॥

आह्मां भोग मोक्षाचां ठांड । ते श्रीमूर्ति वांचूनि नाहिं ।

ह्मणौनि तैसा चि साकारु होई । हें संहारी आतां ॥ ९८ ॥

श्रीभगवानुवाच ।

मया प्रसन्नेन तवार्जुनेदं
 रूपं परं दर्शितमात्मयोगात् ।
 तेजोमयं विश्वमनंतमाद्यं
 यन्मे त्वदन्येन न दृष्टपूर्वम् ॥ ४७ ॥

एया अर्जुनाचेया बोला । विश्वरूपा विस्मो जाला ।
 ह्मणे ऐसा नाहिं देखिला । घसाल कोणही ॥ ९९ ॥
 कोणि हे वस्तु लाधलासि ।
 तेया लाभाचा तोपु नेघसि ।
 मां भेणें काइ बोलसि ।
 हेंकाडु ऐसा ॥ ६०० ॥
 आह्मीं सवियां चि जें प्रसन्न होणें ।
 तैं आंग चि वारि ह्मणे देणें ।
 वांचूनि जीउ असे वेचणें ।
 कव्हणा लागि ॥ १ ॥
 तें हें तूक्षिये चाडे । आजि जीवाचें चि दलवाडें ।
 कालौनियां एवडें । रचिलें ध्यान ॥ २ ॥
 ऐसी पै तूक्षिया आवडी । जाली प्रसन्नता आमची एवडी ।
 ह्मणौनि गौप्याची ही गुढी । उभिली जर्गी ॥ ३ ॥
 तें हें देख अपार । स्वरूप माझें पर ।
 एथौनि ते अवतार । कृष्णादिकांचे ॥ ४ ॥
 हें ज्ञानतेजाचें निखल । विश्वात्मक केवल ।
 अनंत हें अदल । आद्य हें ॥ ५ ॥
 आणि हें तुज वांचूनि अर्जुनां । पूर्वी दृढ नाहिं आना ।
 जें न्हवे जोगें साधना । ह्मणौनियां ॥ ६ ॥

न वेदयज्ञाध्ययनेन दानै
न च क्रियाभिर्न तपोमिरुग्रैः ।

एवंरूपः शक्य अहं नृलोके ।

द्रष्टुं त्वदन्येन कूरुप्रवीर ॥ ४८ ॥

एयाची सोय पातले । आणि वेदीं मौन चि घेतलें ।

यज्ञ किर माघौते आले । स्वर्गौनि चि ॥ ७ ॥

साधकिं देखिला आयासु । म्हणौनि निर्वाळिला योगाभ्यासु ।

आणि अध्ययनासि सोरसु । नाहिं एथ ॥ ८ ॥

सिधेंचि सत्कर्म । धाविनलीं संभ्रमें ।

तिहिं बहुते एके श्रमें । सत्यलोकु टाकिला ॥ ९ ॥

तिहिं स्वर्ग देखिलें । आणि उग्रपणें उगेयां चि सांडिलें ।

एवं साधना जें ठेलें । अपटांतरिं ॥ ६१० ॥

हें तुवां अनायासें । विश्वरूप देखिलें जैसें ।

इये मनुष्यलोकिं तैसें । न फवे चि कोणहां ॥ ११ ॥

आजि ध्यानसंपत्ती लागि । तूं चि एकु आथि जगीं ।

हें भाग्य देखें आंगीं । विरिंची ही नाहिं ॥ १२ ॥

मा ते व्यथा मा च विरूढभावो

दृष्ट्वा रूपं घोरमीदृङ्गमेदम् ।

व्यपेतभीः प्रीतमनाः पुनस्त्वं ।

तदेव मे रूपमिदं प्रपश्य ॥ ४९ ॥

म्हणौनि विश्वरूपिं श्लाघ । एथिचें भय नेव ।

हें वांचूनि चांग । न मनी काहिं ॥ १३ ॥

समुद्र अमृता भरला । आणि अवसांत वरिपडा जाला ।

मग कव्हणीं आथि वोसंडिला । बुडिजैल म्हणौनि ॥ १४ ॥

नातारि सोनेयाचा डोंगर । काइ करावा हा थोर ।

ऐसें म्हणौनि अन्हेरु । करी कोणहीं ॥ १५ ॥

दैवें चिंतामणि लेइजे । किं तेयातें वोझें ह्यणौनि उ०संडिजे ।

ना तरि कामधेनु दवडिजे । न पोसवे ह्यणौनि ॥ १६ ॥

हां गा चंद्रमा आलेयां घरा ।

तेयातें ह्यणिजे निगैं न कारिं उवारा ।

पडिसाई पाडितासि दिनकरा ।

परता सरैं ॥ १७ ॥

तैसें ऐश्वर्य हें महातेज । दृष्ट जालें गा तुज ।

परि वायां चि गजवज । करितासि कां ॥ १८ ॥

परि नेणसि गा धनंजया । काइ कोपों गावढेया ।

आंग सांडूनि छाया । आलंगिसी कां ॥ १९ ॥

हें नव्हे जो मी साचें । ऐसें मन करिसी हो काचें ।

प्रेम धरूनि आवगणिचें । निहालिसी कां ॥ २० ॥

तरि आझू वेन्हीं पार्था । सांडिं थाया हो आतां ।

इये विषिं आस्था । चोरिसि झनें ॥ २१ ॥

हें रूप जन्हीं घोर । विकृत आणि थोर ।

तन्हीं कृतनिश्चयासि घर । हें चि करीं ॥ २२ ॥

कृपणाची चित्तवृत्ति जैसी । राउनि घातली ठेवेया पासिं ।

मग नसुधेनि देहेंसिं । आपणपां असे ॥ २३ ॥

कां अजातपक्षा जवला । जीउ बैसौनि तिया आविसाला ।

पक्षिणी अंतराला । उडौनि जाये ॥ २४ ॥

ना गाय चरे डोंगरीं । परि चित्त बांधलें वत्सें घरीं ।

तैसें प्रेम येथ करीं । पार्था तूं ॥ २५ ॥

एरें उवाइलेनि चित्तें । बाह्य सख्य यया सुखा पुरतें ।

भोगि जो कां तिये श्रीमूर्त्तिं । चतुर्भुजे इये ॥ २६ ॥

परि पुडुतीं पुडुतीं पांडवा । हा येकु बोळु न विसरावा ।

जें इये रूपौनि सद्भावा । नेंदावें निगों ॥ २७ ॥

हैं कहिं चि नन्हें देखिलें । हणौनि तुज भय उपनलें ।
 तें सांडिं एथ संचलें । असें दे प्रेम ॥ ६२८ ॥
 आतां करूं तूझेया सारिलें । हणितलें विश्वतोमुखें ।
 तरि मागील रूप सुखें । दाउं तुज ॥ २९ ॥
 ऐसैं वाक्य बोलत खेउ । मागुता मनुष्य जाला देउ ।
 ऐसा देखां नवलाउ । आवडिचा तिये ॥ ६३० ॥
 कृष्णु कैवल्य उघडें । वरि सर्वस्व विश्वरूपा येवडें ।
 हातिं दीधलें किं नावडे । अर्जुनासि ॥ ३१ ॥
 बारुकां बारुणु वारिजे । जैसैं रत्नासि दूषण ठेविजे ।
 ना तरि कन्या पाहुनु हणिजे । मना नये ॥ ३२ ॥
 तेया विश्वरूपा येवडी दशा । कारितां प्रीतिचा वाढु कैसा ।
 सेल दीधली असे उपदेशा । किरीटीसि देवें ॥ ३३ ॥
 मोडूनि भांगाराचा रवा । लेणीं घडिजति आपुलेया सवा ।
 मना नावडे जरि जीवा । तरि आटिजे पुडुतीं ॥ ३४ ॥
 तैसें शिष्याचिये प्रतीती जालें । कृष्णत्व होतें तें विश्वरूप केलें ।
 तें मना नये चि तेव्हलें आणिलें । कृष्णपण मागुतें ॥ ३५ ॥

संजय उवाच ॥

इत्यर्जुनं वासुदेवस्तथोक्त्वा

स्वकं रूपं दर्शयामास भूयः ।

आश्वासयामास च भीतमेनं

भूत्वा पुनः सौम्यवपुर्महात्मा ॥ ५० ॥

हा ठावो वेन्हीं शिष्याची निशि ।

साहाते गुरु काइ आहाति देशीं ।

परि नेणिजे आवडि कैसी ।

संजयो हाणे ॥ ३६ ॥

मग विश्व व्यापूनि भवतें । जें योगतेज प्रकटलें होंतें ।
 तें हारतलें आइतें । रूपिं तिये ॥ ३७ ॥
 जैसें त्वंपद हें आघवें । तत्पदार्थी सामावे ।
 अथवा दृमाकार सांठवे । बीजकणिके ॥ ३८ ॥
 ना तरि स्वप्नसंभ्रमु जैसा । गिली चेइली जीवदशा ।
 श्रीकृष्णें योगु तैसा । संहारिला तो ॥ ३९ ॥
 जैसी हारतली प्रभा बिंबि । कां जलदसंपति नभीं ।
 भरितें सिंधुगर्भी । रिगालें राया ॥ ४० ॥
 हों काज कृष्णाकृतिचिया मोडी । होती विश्वरूपाची घडी ।
 ते अर्जुनाचिया आवडी । उपलविली देवें ॥ ४१ ॥
 तव प्रमाण आणि रंगु । देखिला सवियां चांगु ।
 तेथ ग्राहकैये जाला लागु । म्हणौनि केली पुडुतीं ॥ ४२ ॥
 तैसें वाढिचेनि बहुवसपणें । रूपें विश्व जितलें जेणें ।
 तें सौम्य कोडिसवाणें । साकार जालें ॥ ४३ ॥
 किंबहुना अनंतें । धाकुटेपण धरलें मावौतें ।
 परि आश्वासिलें पार्थीतें । भियालेयातें ॥ ४४ ॥
 तेथ स्वप्नीं स्वर्गा गेला । तो अवसांत जैसा चेइला ।
 तैसा विस्मयो जाला । किरीटीसी ॥ ४५ ॥
 नातरि गुरुकृपे सवें । उतरलें प्रपंचजात आघवें ।
 स्फुरे तत्व तेवि पांडवें । मूर्ति देखिली ॥ ४६ ॥
 तेया पांडवा ऐसें चित्तीं । आड विश्वरूपाची जवनीक होती ।
 ते फिटौनि गेली परौती । हें भलें जालें ॥ ४७ ॥
 काइ कालातें जीणौनि आलां ।
 किं मियां महाबातु मागां सांडिला ।
 नातरि आपुलां बाहिं उतरलां ।
 सिंधु सातें ॥ ४८ ॥

आइकैं द्वारकापुरसुहडा । मज सुकतेया जी झाडा ।
 हे भेटि नव्हे हुडा । मेघांचा जाला ॥ ६० ॥
 सावियां तृषा फूटला । तेया मज अमृतसिंधु भेटला ।
 आतां भरघंसा जाला । जाणेयांचा ॥ ६१ ॥
 माझां हृदयरंगणीं । होतसे हरिपलतांची लावणी ।
 सुखेंसि बुझावणी । जाली मज ॥ ६२ ॥

श्रीभगवानुवाच ।

सुदुर्दर्शमिदं रूपं दृष्टवानसि यन्मम ।

देवा अप्यस्य रूपस्य नित्यं दर्शनकांक्षिणः ॥ ५२ ॥

या पार्थाचेया बोला सवें । हें काइ गा ह्मणितलें देवें ;—
 तुवां प्रेम ठेउनि यावें । विश्वरूपीं किं ॥ ६३ ॥
 मग इये श्रीमूर्ती । भेटावे सडिया आइती ।
 हें सिखवणें सुभद्रापती । विसरलासि पै ॥ ६४ ॥
 पै लावलेयां अर्जुना । मेरु ही आवडे साना ।
 ऐसा आधि मना । दुःस्वप्नभावो ॥ ६५ ॥
 तें हें विश्वात्मक रूपडें । जें दाविलें गा तुजपुढें ।
 तें शंभू ही न जोडे । तप करितां ॥ ६६ ॥
 अष्टांगादि संकटीं । योगी सीणताति किरीटी ।
 पारि अवसर नाहिं भेटी । जेयाचिये ॥ ६७ ॥
 तें विश्वरूप एकधा वेलु । देखौनि काये अलुमालु ।
 ऐसें करितां कालु । जांतसे देवां ॥ ६८ ॥
 आशेचिया आंजुली । ठेउनि हृदयाचां निडलीं ।
 चातक निरालीं । लागलें जैसें ॥ ६९ ॥
 तैसे उत्कंठानिर्भर । होउनियां सुरवर ।
 घोकित आठे पाहार । भेटि जेयाची ॥ ७० ॥

पैं विश्वरूपा सारिखें । स्वप्नीं हिं कव्हणीं नेदखे ।
जें प्रत्यक्ष तुवां सुखें । देखिलें हें ॥ ७१ ॥

नाहं वेदैर्न तपसा न दानेन न चेज्यया ।
शक्य एवंविधो द्रष्टुं दृष्टवानसि मां यथा ॥ ५३ ॥

पैं उपायांसि वाटा । नव्हति एथ सूभटा ।
सावाइं वोहटा । बाहिला वेदें ॥ ७२ ॥
मज विश्वरूपाचिया मोहरा । चालावेया धनुर्द्वरा ।
तपांचिया हीं सर्वभारा । न्हवे चि लाडु ॥ ७३ ॥
आणि दान किरु हें कानडें । मीं यज्ञीं हीं तैसा न संपडे ।
जैसेनि कां सुरवाडें । देखिलें तुवां ॥ ७४ ॥

भक्त्या त्वनन्यया शक्य अहमेवंविधोऽर्जुन ।
ज्ञातुं द्रष्टुं च तत्त्वेन प्रवेष्टुं च परंतप ॥ ५४ ॥

तैसा मी एकी चि परी । आंतुडें गा अवधारिं ।
जरि भक्ति एउनु वरी । चित्त माझें ॥ ७५ ॥
ते चि भक्ति ऐसी । पर्जन्याची सूटिका जैसी ।
धारा वांचूनि अनारिंसी । गोठि नेणे ॥ ७६ ॥
कां सकल जलसंपत्ती । घेउनि समुद्रातें गिवसिती ।
गंगा जैसी अनन्यगती । मीनली चि मिले ॥ ७७ ॥
तैसें गा सर्वभावभारें । न धरत प्रेम एकसरें ।
मज माझि संचरे । मी चि होउनि ॥ ७८ ॥
आणि तेविं चि मीं ऐसा । थडिये माझारी सारिसा ।
क्षीराब्धि कां जैसा । क्षीराचा चि ॥ ७९ ॥
तैसें मज लागूनि मुंगी वेन्हीं । किंवहुना चराचरीं ।
भजनासि गा दुसरी । भ्रांति पैं नाहिं ॥ ८० ॥
तैं तेया चि क्षणा सवें । येवंविधु मीं जाणवें ।
जाणितलां तरि स्वभावें । द्रिष्टुं होये ॥ ८१ ॥

मग इंधनि आगि उदिपे । आणि इंधन हें भाष हारपे ।
 तें अग्नी चि होउनि आरोपे । मूर्त जेवि ॥ ८२ ॥
 कां उदो न करिजे तेजकरें ।
 तव गगन चि होउनि असे आंधारें ।
 मग उदैलेयां एकसरें ।
 प्रकाशु होए ॥ ८३ ॥
 तैसें माझां साक्षात्कारी । सरे अहंकाराची वारी ।
 अहंकारलोपीं अवधारीं । द्वैत जाए ॥ ८४ ॥
 मग मीं तो हें आघवें । एकु मीं चि आधि स्वभावें ।
 किंवहुना सामावे । समरसें तो ॥ ८५ ॥

मत्कर्मकृन्मत्परमो मद्भक्तः संगवर्जितः ।

निर्वैरः सर्वभूतेषु यः स मामेति पांडव ॥ ५५ ॥

जो मज चि एका लागि । कमें वाहांतसे आंगीं ।
 जेया मज वांचूनि जगीं । गोमटें नाहिं ॥ ८६ ॥
 दृष्टादृष्ट सकल । जेयासि मीं चि केवल ।
 जेणें जियावेयाचें फल । मज चि नावें ठेविलें ॥ ८७ ॥
 भूतें हें भाष विसरला । जें दीठी मी चि आहें बांधला ।
 ह्मणौनि निर्वैर जाला । सर्वत्र भजे ॥ ८८ ॥
 ऐसा जो भक्तु होये । तेयाचें त्रैधातुक जें आहे ।
 तें मीं चि होउनि ठायें । पांडवा गा ॥ ८९ ॥
 ऐसें जगदुदरदोंदिलें । तेणें करुणारसकळोलें ।
 संजयो ह्मणे बोलिलें । कृष्णदेवें ॥ ९० ॥
 आतां यावारि तो पांडुकुमर । जाला असे आनंदसंपदा धोर ।
 आणि कृष्णचरणचतुर । एकु चि तो जगीं ॥ ९१ ॥
 तेणें देवाचिया दोन्ही मूर्ती । नीकिया निहालिलिया चित्तीं ।
 तव विश्वरूपा पाहूनि कृष्णमूर्ती । देखिला लामु ॥ ९२ ॥

परि तेयाचिये जाणिवे । मानु न करिजे चि देवें ।
 जें व्यापक पाहूनि न्हवे । एकदेशिय ॥ ९३ ॥
 आणि हें चि सामर्थ्यावेया लागि । येकि दोनि चांगी ।
 उपपत्ती शारंगी । दाविता जाला ॥ ९४ ॥
 तिया आइकौनि सुभद्राकांतु । चित्ति असे क्षणतु ।
 परि होये जे दोन्ही आंतु । तें पुडुतीं पुसों ॥ ९५ ॥
 ऐसा आलो चुकरूनि जीवीं । आतां पूसती वोज बरवी ।
 आदरील ते परिसावी । पुढील कथा ॥ ९६ ॥
 प्रांजल वोवीप्रबंधें । गोठि सांघिजैल विनोदें ।
 निवृत्तिपादप्रसादें । ज्ञानदेऊ क्षणे ॥ ९७ ॥
 भरूनि सद्वाचाचिया आंजुली । मियां वोवीफुलें मोकलीं ।
 अर्पिलीं अंग्रियुगुलीं । विश्वरूपाचां ॥ ९८ ॥

ॐ ॥ तत्सदिति श्रीमद्भगवद्गीतासूपनिषत्सु ब्रह्मविद्यायां
 योगशास्त्रे श्रीकृष्णार्जुनसंवादे विश्वरूपदर्शन-
 योगो नाम एकादशोऽध्यायः ॥११॥

॥ श्रीकृष्णार्पणमस्तु ॥



ज्ञानेश्वरी

अध्याय बारावा

॥ श्रीगणेशायनमः ॥

जय जय सिद्धे । उदारे प्रसिद्धे ।
अनव्रत आनंदे । वर्त्तितिये ॥ १ ॥
विषयव्यालें मीठी । दीधलेयां उठणें नाहिं ताठि ।
तूझेनि वो गुरुद्रिष्टी । होये माए ॥ २ ॥
तरि ताप कोणातें पोली । कैसेनि सोसु जाली ।
जरि प्रसादरसकल्लोलीं । पूर्वे येसि तूं ॥ ३ ॥
योगसुखाचे सोहले । सेवकां दावीसि खेहाले ।
सोहंसिद्धीचे लले । पालीसि तूं ॥ ४ ॥
आधारशक्तीचां अंकिं । वाढविसि तूं कौतुकिं ।
हृदयकोशपालकीं । हालवीसि पै ॥ ५ ॥
प्रत्यग्ज्योतीची वोवालणी । करिसि मनपवनाचिं खेलणिं ।
रिद्धीसिद्धीचिं बाललेणीं । लेववीसि माये ॥ ६ ॥
सतराविधेचें स्तन्य देसी । अनाहताचा हल्लरु गासी ।
समाधिबोधें निजविसी । बुझाउनि ॥ ७ ॥
म्हणौनि साधकां तूं माउली । । पीके सारस्वत तूझां पाउलीं ।
या कारणें साउली । न संडीं तूझी ॥ ८ ॥
आवो सद्गुरुचिये दीठी । तूझें कारुण्य जेयातें आधिष्ठी ।
तो सकलविद्याचिये श्रृष्टी । धात्रा होए ॥ ९ ॥

म्हणौनि अंबे श्रीमते । निजजनकल्पलते ।
 आज्ञा दे पां माते । निरूपणीं ॥ १० ॥
 नवरसां भरविं सागर । करविं उचितरत्नाचे आगर ।
 भावार्थाचे गिरिवर । निफजविं माये ॥ ११ ॥
 साहित्यसेनेयांचिया खाणी । उघडविं देशीचिया अक्षोणी ।
 विवेका वेलीची लावणी । होंदे सैव ॥ १२ ॥
 संवादफलनिधानें । प्रमेयाचि उद्यानें ।
 लावीं म्हणे गहनें । निरंतर ॥ १३ ॥
 पाखांडाचे दरकुटे । मोडीं वाग्वद अव्हांटे ।
 कुतर्काचिं दुष्टे । सावजें दवडीं ॥ १४ ॥
 श्रीकृष्णचराणिं माते । सर्वत्र करिं वसते ।
 राणिचे बैसवीं श्रोते । श्रवणाचिये ॥ १५ ॥
 मन्हाटियेचां नगरीं । ब्रह्मविद्येचा सुकालु करीं ।
 घेणें देणें सुखचि वेन्हीं । जगा होंदेइ ॥ १६ ॥
 तू आपुलेनि स्नेहपल्लवे । माते पांगुरवीसि सदैवें ।
 तरि आतां चि हें आघवे । निर्मीन मीं ॥ १७ ॥
 इथे विनवणिये साठिं । अवलोकिलें गुरुद्विष्टी ।
 ह्मणे गीतार्थेसिं उठीं । न बोल वहुं ॥ १८ ॥
 येथ जी जी महाप्रसादु । ह्मणौनि सवियां जाला आनंदु ।
 आतां निरोपिजैल प्रबंधु । अवधान दीजो ॥ १९ ॥

अर्जुन उवाच ।

एवं सततयुक्ता ये भक्तास्त्वां पर्युपासते ।

ये चाप्यक्षरमव्यक्तं तेषां के योगवित्तमाः ॥ १ ॥

तरि सकलवीराधिराजु । तो सोमवंशु विजयध्वजु ।

बोलता जाला आत्मजु । पांडुनृपाचा ॥ २० ॥

कृष्णातें ह्मणे अवधारिलें । आपण विश्वरूप मज दाविलें ।
 तबं नवल ह्मणौनि भ्यालें । चित्त माझें ॥ २१ ॥
 आणि ये कृष्णमूर्तीची सवे । ह्मणौनि सोये धरिली जीवें ।
 तबं नको ह्मणौनि देवें । वारिलें मातें ॥ २२ ॥
 तरि व्यक्त आणि अव्यक्त । तूंचि येक निभ्रांत ।
 भक्ती पाविजे व्यक्त । अव्यक्त योगें ॥ २३ ॥
 या दोनी चि जी वाटा । तूतें ठाकावेया वैकुंठा ।
 व्यक्तअव्यक्ताचां दारवठां । रिगिजे येथ ॥ २४ ॥
 पै जे बानी झेया तूकां । ते चि वेगली वाला येका ।
 ह्मणौनि येकदेशी व्यापका । पाडु नेदखें ॥ २५ ॥
 अमृताचां सागरिं । जे लाभे सामर्थ्याची धोरी ।
 ते चि दे अमृतलहरी । चुलिं घेतलेयां ॥ २६ ॥
 हे किर माझां चित्तीं । प्रतीति आथि जी निरुती ।
 परी पूसणें योगपती । याचिलागि ॥ २७ ॥
 जें देवा तूझीं नावेक । अंगिकारिलें व्यापक ।
 तें साच किं कवतिक । हें जाणावेया ॥ २८ ॥
 तरि तुजलागि सर्वम । तू जेयांचें परम ।
 भक्तीसि मनोधर्म । विकूनि घातले ॥ २९ ॥
 इत्यादि सर्वे परीं । जे भक्त तूतें हरी ।
 बांधौनियां जिह्वारीं । उपासिती ॥ ३० ॥
 आणि प्रणवापैलीकडे । वैखरीसि जें कांनडें ।
 काइसेया ही सांघडें । नव्हे जे वस्तु ॥ ३१ ॥
 तें अक्षर जी अव्यक्त । निर्देशदेशरहित ।
 सोहंभावें उपासित । योगिये जे ॥ ३२ ॥
 तेयां आणि जी भक्तां । येयां येरयेरां अनंता ।
 कवणें योगें तत्त्वता । जाणीतला सांघें ॥ ३३ ॥

श्रीभगवानुवाच ।

मय्यावैश्य मनो ये मां नित्ययुक्ता उपासते ।

श्रद्धया परयोपेतास्ते मे युक्ततमा मताः ॥ २ ॥

या किरीटिचिया बोला । तो विश्वव्यापकु संतोखला ।

म्हणे प्रभु पै भला । केला तुवां ॥ ३४ ॥

तारि अस्तगिरिचां उपकंठीं । रिगालेया रविबिंबापाठीं ।

रश्मि जैसे किरीटी । संचरति गा ॥ ३५ ॥

तैसे सर्व इंद्रियें सहित । मजमाक्षि सूनि चित्त ।

रातिदीनु न म्हणत । उपासिति जे ॥ ३६ ॥

पारि टाकिलेयांहि सागर । जैसा मागील यात्रा अनिवार ।

तिथे गंगेचिया ऐसा पडिभर । प्रेमभावां ॥ ३७ ॥

वरुणाकालि सरिता । जैसी चढों लागे पांडुसुता ।

तैसी दूणे वारि भजतां । श्रद्धा दीसे ॥ ३८ ॥

येयापरि जे भक्त । आपणपें मज देत ।

ते मी योगयुक्त । परम मानीं ॥ ३९ ॥

ये त्वक्षरमनिर्देश्यमव्यक्तं पर्युपासते ।

सर्वगमचिन्त्यं च कूटस्थमचलं ध्रुवम् ॥ ३॥

आणि येर ते पांडवा । जे आरुढौनि सोहंभावा ।

झोबति निरयवां । अक्षरासि ॥ ४० ॥

जेथ मनाची नाखि न लगे । तेथ बुद्धीची ही दीठि न रिगे ।

इंद्रियां किर जोगें । होईल कायि ॥ ४१ ॥

परि ध्याना हि कुवाडें । हणौनि येके ठाई न संपडे ।

व्यक्तीसि माक्षिवडें । होईल कायि ॥ ४२ ॥

जेया सर्वत्र सर्वपणें । सर्विहिं कालि असणें ।

जें पाहूनि चितणें । हिंपुटी जालें ॥ ४३ ॥

जें होये ना नव्हे । जें नाहि ना आहे ।

जें पाहुनु उपाये । उपजति ना ॥ ४४ ॥

जें चले ना ढले । सरे ना मैले ।

तें आपुलेनि बलें । आंगविलें ॥ ४५ ॥

सन्नियम्येन्द्रियग्रामं सर्वत्र समबुद्धयः ।

ते प्राप्नुवन्ति मामेव सर्वभूतहिते रताः ॥ ४ ॥

वैराग्यमहापावकें । जाल्लनि विषयांचि कटकें ।

आधपलिपिं तवकें । इन्द्रियें धरिलीं ॥ ४६ ॥

मग संयमाची धाटी । सूनू मुरुडिलिं याळवटीं ।

कोंडियलीं कपाटीं । हृदयाचां ॥ ४७ ॥

अपानाचिया कवाडा । लाउनि आसनमुद्रा सुहाडा ।

मूलबंधाचा हुडा । पानासिला ॥ ४८ ॥

आसेचे लाग तोडिले । धैर्याचे कडे झाडिले ।

निद्रेचें शोधिलें । कालवखें पै ॥ ४९ ॥

वज्राग्नीचां ज्वालीं । करुनु अपारां धातूंची होली ।

व्याधिचां सीसालीं । पूजिलीं यंत्रें ॥ ५० ॥

मग कुंडलगियेचा टेंभा । आंधारीं करुनि उभा ।

तिया चोजविलिया प्रभा । निमथावेन्हीं ॥ ५१ ॥

नवद्वाराचां चौकीं । बाणूनि संयतेचां आडवंकी ।

उघडिलीं खिडकी । ककारांतीची ॥ ५२ ॥

प्राणशक्ती चामुंडे । प्रहारुनि संकल्पमोडे ।

मनोहौषाचेनि मुंडें । बलि दीन्हली ॥ ५३ ॥

मग चंद्रसूर्या बुझावणी । करुनि अनाहताची मुडावणी ।

सत्रावियेचें पाणीं । जितलें वेगां ॥ ५४ ॥

मग मध्यमामध्यविवरें । तेणें कोरिवें दादरें ।

टाकिलें चवरें । ब्रह्मरंध्रिचें ॥ ५५ ॥

वारि मकारांत सोपान । तें सांडूनियां गहन ।
 काखे सूनि गगन । भरले ब्रह्मीं ॥ ५६ ॥
 ऐसेनि जे समबुद्धी । गिलावेया सोहंसिद्धी ।
 आंगिवीति निस्वधी । योगदुर्गे ॥ ५७ ॥
 आपुलिया साटोवाटी । घेंति शून्य उठाउठी ।
 तेही मातें किरीटी । पावति गा ॥ ५८ ॥

क्लेशोधिकतरस्तेषामव्यक्तासक्तचेतसाम् ।

अव्यक्ता हि गतिर्दुःखं देहवद्भिरवाप्यते ॥ ५ ॥

वांचूनि योगाचेनि वलें । अधिक काहिं मिले ।
 ऐसें नाहिं आगले । कष्टचि तेयां ॥ ५९ ॥
 जिहिं सकलभूताचां हिति । निरालंब अव्यक्तीं ।
 पसरिलिया मती । भक्तीबीण ॥ ६० ॥
 तेया महेंद्रादिपदे । करीति वाटवंधें ।
 रिद्धीसिद्धीसिं द्वंद्वें । पाडौनि ठांति ॥ ६१ ॥
 कामक्रोधांचे विलग । उठावती अनेग ।
 आणि शून्येंसि आंग । जूझावें किं ॥ ६२ ॥
 ताहाना ताहान चि पियावी । भूकैलेयां भूक चि खावी ।
 अहोरात्रि वाविं । भवावा वारा ॥ ६३ ॥
 उनीदेयाचें पडुडणें । निरोधाचें वेल्हावणें ।
 झाडेंसि साजणें । चालावें गा ॥ ६४ ॥
 सीत वेढावें । उष्ण पांघुरावें ।
 वृष्टीचेया असावें । घरा आंतु ॥ ६५ ॥
 किंबहुना पांडवा । हा अग्निप्रवेशु नीच नवा ।
 भातारेंविण करावा । तो हा योगु ॥ ६६ ॥
 स्वामिचें काज । ना बापिकें व्याज ।
 परि यमैसि जूझ । नीच नवें ॥ ६७ ॥

ऐसे मृत्यूहूनि तिख । कां घोंटे जलें विख ।
 डोंगर गीलितां मुख । न फटे काई ॥ ६८ ॥
 ह्मणौनि योगाचिया वाटा । जे निगाले गा सूभटा ।
 त्यांसि दुःखाचा वाटा । भागासि आला ॥ ६९ ॥
 पाहे पां लोहाचे चणे । बोचरां पडती खाणें ।
 तें पोट भरणें किं प्राणें । शुद्धि ह्मणों ॥ ७० ॥
 ह्मणौनि समुद्र बाहीं । तरणें आथि केहीं ।
 गगनामाजि पाई । खोलिजत असे ॥ ७१ ॥
 बलघलेयां थाटी । आंगि न भरतां काठी ।
 सूर्याची पाउटी । होववे काइ गा ॥ ७२ ॥
 यालागि पांगुलां हेवा । नव्हे वायूसि पांडवा ।
 तेवि देहवंतां जीवां । अव्यक्ति गति ॥ ७३ ॥
 ऐसा ही जन्हीं धिवंसा । बांधौनियां आकाशा ।
 झोबति तरि क्लेशा । पात्र होती ॥ ७४ ॥

ये तु सर्वाणि कर्माणि मयि संन्यस्य मत्पराः ।

अनन्येनैव योगेन मां ध्यायंत उपासते ॥ ६ ॥

ह्मणौनि येर तयांची वार्ता । परिसैं गा पार्था ।
 जे कां भक्तिपंथा । वोढंगले ॥ ७५ ॥
 कमें इद्रियें सुखें । करीति कमें अशेषें ।
 जियें कां वर्णविशेषें । भोगासि आलीं ॥ ७६ ॥
 विधितें पालीत । निषेधातें गालीत ।
 मज देउनि जालीत । कर्मफलें ॥ ७७ ॥
 ऐसिया परि पाहिं । अर्जुना माझां ठाई ।
 संन्यासूनि नाहिं । करिति कमें ॥ ७८ ॥
 आणिक जें जें सर्व । काहिं एक मानसीक भाव ।
 तेयां मीं बांचूनि धाव । आनौती नाहिं ॥ ७९ ॥

ऐसे जे मत्पर । उपासिति निरंतर ।
 ध्यानसीसैं घर । माझेंचि जाले ॥ ८० ॥
 जेयाचिया आवडी । केली मासिं कुलवाडी ।
 भोग मोक्ष बापुडी । त्यजिलिं कुलें ॥ ८१ ॥
 ऐसे अनन्ययोगें । विकले जिवें आंगें ।
 तेयां काइयेक सांगें । जें मीं करिं ॥ ८२ ॥
 किंबहुना धनुर्धरा । जो मातेचेया ये उदरा ।
 तिये मातेचा सवंसारा । केतुला पां ॥ ८३ ॥
 तेवि मिं तेयां । जैसे असति तैसेयां ।
 कृत तें धनंजया । घेतला पाटा ॥ ८४ ॥
 माझेया आणि भक्तां । सवंसारिची चिंता ।
 काइ समर्थाची कांता । भूकेतें शोची ॥ ८५ ॥
 तैसे ते माझें । कलत्र ऐसें जाणिजे ।
 काइसेनि हिं न लजें । तेयाचेनि मीं ॥ ८६ ॥
 तेयां जन्मृत्युचां लाटीं । झळबली हे सृष्टी ।
 देखूनियां पोटीं । ऐसें जालें ॥ ८७ ॥
 तरि या सिंधूचेनि माजें । कवणासि धाकु नुपजे ।
 येथ झनें माझे । भितिल हान ॥ ८८ ॥
 म्हणौनि गा पांडवा । मूर्तिचा मेलवा ।
 करूनियां गावां । धावतु आलों ॥ ८९ ॥
 सडे जे देखिले । ते ध्यानाचिये कासे लाविले ।
 ग्रहीं घातले । क्रियांतारिं ॥ ९० ॥
 नामाचां सहस्रवेन्हीं । नावा इया अवधारि ।
 सज्जुनि सवंसारिं । तारुं जालां ॥ ९१ ॥
 प्रेमाचिं पेटिं । बांधलिं येकाचां पोटीं ।
 मग नीणिले तटीं । सायुज्याचां ॥ ९२ ॥

परि भक्तांचेनि नावें । चतुष्पदादीक आघवे ।

वैकुंठिचिये राणिवे । योग्य केले ॥ ९३ ॥

तेषामहं समुद्धर्ता मृत्युसंसारसागरात् ।

भवामि न चिरात्पार्थ मय्यावेशितचेतसां ॥ ७ ॥

म्हणौनि गा भक्तां । नाहिं येकिही चिंता ।

तेयांतें समुद्धर्ता । मीं सदा आधि ॥ ९४ ॥

आणि जेधवां चि भक्ती । दीधलिया मज मती ।

तेव्हां चि मज सूती । तेयाचां हिति ॥ ९५ ॥

मय्येव मन आधत्स्व मयि बुद्धि निवेशय ।

निवसिष्यसि मय्येव अत ऊर्ध्व न संशयः ॥ ८ ॥

एया कारणें तुवां । हा मंत्र धनंजया ।

कीजे जें येया । मार्गा भजिजे ॥ ९६ ॥

तरि मन हें येक । माझां स्वरूपीं वृत्तिक ।

करुनि घालीं आणिक । बुद्धी ही हे ॥ ९७ ॥

इयें दोन्ही सारिसिं । मजमाजि प्रेमेंसिं ।

रिगालीं तरि पावसी । मातें चि तूं गा ॥ ९८ ॥

जरी मनें बुद्धि इहिं । घर केलें माझां ठाई ।

तरी सांघें मग काइ । तूं पण ऊरे ॥ ९९ ॥

म्हणौनि दिवा पालवे । सर्वें चि तेज मालवे ।

कां रविबिंबासवें । प्रकाशु जाये ॥ १०० ॥

उचललेया प्राणासरिसिं । इंद्रियें निगति जैसीं ।

तैसा मनबुद्धीपासिं । अहंकार ये ॥ १ ॥

हणौनि माझां स्वरूपीं । मनबुद्धि हे निक्षेपी ।

एतुलेनि सर्वव्यापीं । मी चि होंसि ॥ २ ॥

येया बोला काहिं । अनारिसें नाहिं ।

आपुली आण पाहिं । वांतु असें ॥ ३ ॥

अथ चित्तं समाधातुं न शक्नोषि मयि स्थिरम् ।
अभ्यासयोगेन ततो मामिच्छाप्तुं धनंजय ॥ ९ ॥

अथवा हें चित्त । मनबुद्धीसहित ।
माझां हातिं अचुंधित । न शकसि देवों ॥ ४ ॥
तरि गा येतुकें करीं । यां आठां पाहारां भीतरी ।
एक निमिषभरी देतु । जाये ॥ ५ ॥
मग जें जें निमिष । देखैल माझें सुख ।
तेतुलालें आरोचक । विषइं येईल ॥ ६ ॥
जैसा शरत्कालु निगे । आणि सरिता वोहटों लागे ।
तैसें काढैल वेगें । प्रपंचौनि ॥ ७ ॥
मग पुनिवेहोनि जैसें । शशिर्विवा दिहें दीसें ।
हारपत अवसे । नाहिं चि होए ॥ ८ ॥
तैसें भोगाआंतूनि निगतां । चित्त मजमाझि रिगतां ।
हल्लहल्ल पांडुसुता । मी चि होंसि ॥ ९ ॥
आगा अभ्यासयोगु ह्मणिजे । तो हा येकु जाणिजे ।
येणें कांडयेक न निफजे । ऐसें नाहिं ॥ ११० ॥
येयाचेनि बलें । येकां गती अंतरालें ।
व्याघ्रसर्प प्रांजलें । केले एकीं ॥ ११ ॥
विष किं आहारिं पडे । समुद्रीं मध्यें वाट जोडे ।
एकीं वाग्नब्रह्म थोडें । अभ्यासें केडें ॥ १२ ॥
ह्मणौनि अभ्यासासि काहिं । सर्वथा दुष्कर नाहिं ।
यालागि माझां ठांडें । अभ्यासें मील ॥ १३ ॥

अभ्यासेऽप्यसमर्थोऽसि मत्कर्मपरमो भव ।

मदर्थमपि कर्माणि कुर्वन् सिद्धिमवाप्स्यसि ॥ १० ॥

कां अभ्यासाहीलागि । नाहिं कसु तूझां आंगि ।
तरि आहासि जिया भंगीं । तियाचि अस ॥ १४ ॥

इन्द्रिये न कोडि । भोग न तोडि ।
 अभिमानु न संडी । स्वजातीचा ॥ १५ ॥
 कुलधर्मु चालि । विधिनिषेधु पालि ।
 सुखें तुज सरली । दीन्हली असे ॥ १६ ॥
 पण मने वाचा देहें । जैसा जो व्यापार होए ।
 तो मी करितु आहें । ऐसें न ह्मण ॥ १७ ॥
 करणें कां न करणें । आवयें तो चि जाणे ।
 विश्व चलिजत असे जेणें । ऐसें जाण ॥ १८ ॥
 उणेया पुरेयाचें काहिं । उरों नेंदीं आपुलां ठांइ ।
 संजात चि करुनि घेइ । जीवित हें ॥ १९ ॥
 मालियें जेउतें नेलें । तेउतें निवांत चि गेलें ।
 तेया पाणियां ऐसें जालें । नाठवे हें ॥ २० ॥
 तें यन्हविं तन्हीं सूभटा । हें उजू कां अहंटा ।
 या व्यर्थ खटपटा । करित आहे ॥ २१ ॥
 तरि प्रवृत्ति आणि निवृत्ति । यियें बोझिं नेंघों मती ।
 अखंड चित्तवृत्ति । आठवों मी ॥ २२ ॥
 आणि जें जें कर्म निफजे । तें थोडें बहूत न ह्मणिजे ।
 निवांत चि अर्पिजे । माझां ठांइ ॥ २३ ॥
 ऐसिया मद्गावना । तनूत्यागिं अर्जुना ।
 तूं सायुज्यसिद्धसदना । त्रिशुद्धी एंसी ॥ २४ ॥

अथैतद्व्यशक्तोऽसि कर्तुं मद्योगमाश्रितः ।

सर्वकर्मफलत्यागं ततः कुरु यतात्मवान् ॥ ११ ॥

नातरि हें इं तुज । नेंदवे कर्म सहज ।
 तन्हीं गा तूं मज भज । पांडुसुता ॥ २५ ॥
 बुद्धीचिये पाठि पोठि । कर्मा आदिसेवटीं ।
 मातें बांधलें किरीटी । दुआड जरि ॥ २६ ॥

तारि हेंहि असो । सांडी माझा अतिसो ।
 परि संयतिसीं वसो । बुद्धि भार्गी ॥ २७ ॥
 आगा वृक्षा कां वल्ली । लोटति फलें पीकलीं ।
 तैसिं सांडिं निफनलिं । कर्में सिद्धें ॥ २८ ॥
 परि मातें मनिं धरावें । कां मजउदेशें करावें ।
 हें काहीं चि नोको आघवें । जावों दे शून्य ॥ २९ ॥
 खडकिं जैसें वरिषलें । कां अग्नीमाजि पेरिजें ।
 कर्म मानीं देखिलें । स्वप्न जैसें ॥ ३० ॥
 आगा आत्मजेचां विखिं । जैसा जीउ निराभिलाषी ।
 तैसा कर्मिं अशेषिं । निष्कामु होये ॥ ३१ ॥
 बन्दिची ज्वाला जैसी । वायां जाये आकासिं ।
 क्रिया जिरों दे तैसी । शून्यामाजि ॥ ३२ ॥
 अर्जुना हा फलत्यागु । आवडे कीर आसलगु ।
 परि योगामाजि योगु । धूरेचा हा ॥ ३३ ॥
 येणें फलत्यागें सांडे । तें तें कर्म न विरुडे ।
 येके चि वेले झाडें । वांझें जैसिं ॥ ३४ ॥
 तैसें येणें शरीरें । शरीरा येणें सरे ।
 किंबहुना यरिझारे । चीरा पडे ॥ ३५ ॥

श्रेयो हि ज्ञानमभ्यासाज्ज्ञानाद्ध्यानं विशिष्यते ।

ध्यानात्कर्मफलत्यागस्त्यागाच्छान्तिरनन्तरम् ॥ १२ ॥

पैं अभ्यासाची पाउटी । करुनि टाकिजे किरीटि ।
 ज्ञानें येइजे भेटी । ध्यानाचिये ॥ ३६ ॥
 मग ध्यानेंसिं खेवं । देंति आघवे चि भाव ।
 तेधवां कर्मजात सर्व । दूरि ठाके ॥ ३७ ॥
 कर्म जेथ दुरावे । तेथ फलत्यागु संभवे ।
 त्यागातव आंगवे । शांति सकला ॥ ३८ ॥

क्षणौनि यावेया शांती । हा चि क्रमु गा सुभद्रापती ।
 अभ्यासू चि प्रस्तुति । कारण येथ ॥ ३९ ॥
 अभ्यासाहूनु गहन । पार्था मग ज्ञान ।
 ज्ञानापासूनि ध्यान । विशेषिजे ॥ १४० ॥
 मग कर्मफलत्यागु । तो ध्यानापासौनि चांगु ।
 त्यागातव भोगु । शांतिमुखाचा ॥ ४१ ॥
 ऐसिया एया वाटा । इहिं चि पेणा सूभटा ।
 शांतिचा माजिवटा । टाकिला जेणें ॥ ४२ ॥

अद्वेष्टा सर्वभूतानां मैत्रः करुण एव च ।

निर्ममो निरहंकारः समदुःखसुखः क्षमी ॥ १३ ॥

जो सर्व भूताचां ठाई । द्वेषातें नेणे काहि ।
 आप पर नाहिं । चैतन्या जैसा ॥ ४३ ॥
 उत्तमातें धरिजे । अधमातें अव्हेरिजे ।
 हें काहिं चि नेणिजे । वसुधा जेवि ॥ ४४ ॥
 रायाचें देह चाळ् । रंकातें परउतें गाळ् ।
 हें नेणे चि कृपाळ् । प्राणु पै गा ॥ ४५ ॥
 गाइची तृषा हरं । व्याघ्रा विष होउनि मारं ।
 हें नेणे चि करं । तोय जैसें ॥ ४६ ॥
 घरिचिया उजियेड करावा । पारखेया आंधार होआवा ।
 हें न म्हणे चि पांडवा । दीपु जैसा ॥ ४७ ॥
 ऐसी सर्व भूतमात्रि । यकपणाची मैत्री ।
 कृपेची धात्री । आपण जो ॥ ४८ ॥
 आणि मी हे भाष नेणे । माझे काहिं चि न म्हणे ।
 सुख दुःख जाणणें । नाहिं जेया ॥ ४९ ॥

संतुष्टः सततं योगी यतात्मा दृढनिश्चयः ।

मय्यर्पितमनोबुद्धिर्योमङ्गलः स मे प्रियः ॥ १४ ॥

तेविं चि क्षमे लागि । पृथ्वीचा पवाडु आंगि ।
 संतोषा उत्संगि । घर दीन्हले ॥ १५० ॥
 वरिषायें वीण सागरु । जलें जैसा निर्भरु ।
 तैसा निरउपचारु । संतोषिया जो ॥ ५१ ॥
 वाउनि आपुली आण । धरी अंतष्करण ।
 निश्चया साचपण । जेयाचेनि ॥ ५२ ॥
 जीउ परमात्मा दोन्हीं । बैसौनि एका आसनि ।
 जेयाचां हृदयभुवनी । विराजति ॥ ५३ ॥
 ऐसा योगसमृद्धी । होउनि जो निरवधी ।
 अर्पिति मनोबुद्धि । माझां ठाई ॥ ५४ ॥
 आंतु बाहिरि योगु । निर्वाळला चांगु ।
 माझा अनुरागु । सप्रेमु जेया ॥ ५५ ॥
 अर्जुना तो चि भक्तु । तो चि योगी मुक्तु ।
 तो बलुभा मी कांतु । ऐसा पढियें ॥ ५६ ॥
 हें नां तो आवडे । जीवाचेनि पाडें ।
 हें इं येथ थोडें । रूप करणें ॥ ५७ ॥
 पढियंतेयाची काहाणी । हें भूलिची भारणी ।
 येथौनि बोलणीं । बोलवती ॥ ५८ ॥
 ह्मणौनि गा आह्मां । वेगिं आली उपमा ।
 यन्हविं काइ प्रेमा । उपमा असे ॥ ५९ ॥
 आतां असो हें किरीटि । प्रियाचिया गोठी ।
 दूणा थाउं ऊठी । आवडि गा ॥ १६० ॥
 तेया ही वरि विपाथें । प्रेमल संवादियें होये ।
 तारि तिये गोडिये काय आहे । कांटाळें गा ॥ ६१ ॥
 ह्मणौनि गा पार्था । तूं चि प्रियु आणि श्रोता ।
 वरि प्रियाची वार्त्ता । प्रसंगें आली ॥ ६२ ॥

तरि आतां बोलों । भलेया सुखा मीनलों ।

ऐसें ह्मणौनि डोलों । लागले देउ ॥ ६३ ॥

यस्मान्नोद्विजते लोको लोकान्नोद्विजते च यः ।

हर्षामर्षभयोद्वेगैर्मुक्तो यः स च मे प्रियः ॥ १५ ॥

मग ह्मणे जाण । तेयाचें लक्षण ।

जेया मीं अंतष्करण । वैसें घाली ॥ ६४ ॥

तरि सिंधूचेनि माजें । जलचरां भय नुपजे ।

आणि जलचारिं नु बुजे । समुद्रु जैसा ॥ ६५ ॥

तेवि उन्मत्ते जगें । जेयासि खंति न लगे ।

आणि जेयाचेनि आंगें । न सिणें लोकु ॥ ६६ ॥

किंबहुना पांडवा । शरीर जैसें अवयवां ।

तैसा नुभगे जीवा । जिवपणें जो ॥ ६७ ॥

हें जग चि देह जालें । म्हणौनि प्रियाप्रीय गेलें ।

हर्षामर्ष ठेले । दूरि जेया ॥ ६८ ॥

ऐसा जो द्वंद्वमुक्त । भयोद्वेगरहितु ।

एया ही वरि भक्तु । माझां ठांइ ॥ ६९ ॥

तरि तेयाचा गा मज मोहो । काय सांधों तो पढियो ।

हें असो जिवें जीवो । माझेंनि तो ॥ १७० ॥

जो निजानंदें धाला । परिणामां आयुष्य आला ।

पूर्ण तेजाला । वल्लभु तो ॥ ७१ ॥

जेयाचां ठांइ पांडवा । अपेक्षे नाहिं रिगावां ।

सुखासि चढावा । जेयाचें असणें ॥ ७२ ॥

गंगा शुचि होये । पाप ताप जाये ।

परि तेथ आहे । बुडणें येक ॥ ७३ ॥

अनपेक्षः शुचिर्दक्ष उदासीनो गतव्यथः ।

सर्वारंभपरित्यागी यौ मद्भक्तः स मे प्रियः ॥ १६ ॥

मोक्ष देउनि उदार । कासी होये किर सधर ।
 परि वेचावें लागे शरीर । तिथे गाविं ॥ ७४ ॥
 हिमवर्ति दोष जाये । परि तेथ जीविताची हाणि होए ।
 तैसें सुचित नव्हे । सज्जनाचें ॥ ७५ ॥
 खोलिये पारु नेणिजे । तन्हीं संतीं न बुडिजे ।
 रोकडेया आणि लाहिजे । मोक्षु फुका ॥ ७६ ॥
 संतांचेनि आंगलगें । पापातें जिणणें गंगे ।
 तेयांचें मिं सांगें । सुचित्व कैसें ॥ ७७ ॥
 ह्यणुनु असो जो ऐसा । शुचित्वें तीर्था कुवांसा ।
 जेणें लंघविलें दिशा । मनोमल ॥ ७८ ॥
 आंतु बाहिरि चोखालु । सूर्यु जैसा निर्मलु ।
 आणि तत्त्वार्थाचा पायलु । देखणा जो ॥ ७९ ॥
 व्यापक आणि उदास । जैसें हें आकाश ।
 तैसें जेयाचें मानस । सर्वगत ॥ १८० ॥
 जो सवसारव्यथा फीटला । निरास्यें निवडला ।
 फांसाडूनि सूटला । विहंगु जैसा ॥ ८१ ॥
 तैसा संततु स्वसुखें । कव्हणी चटवंच ने दखे ।
 नेणिजे गतायुष्यें । लज्जा जैसी ॥ ८२ ॥
 आणि कर्मरंभा लागि । जेया अहंक्रुति नाहि आंगि ।
 तैसा उपशमू चि भागा । जेयासि आला पै गा ।
 जो मोक्षाचिया आंगा । लिहिला जैसा ॥ ८३ ॥
 अर्जुना हा ठावो वेन्हीं । सोहंभावसरोवरी ।
 द्वैताचां पडली तीरी । उतरों सरला ॥ ८५ ॥
 किं भक्तिसुखा लागि । आपण चि जाला दों भागी ।
 बांटूनियां आंगीं । सेवकै बाणी ॥ ८६ ॥

येरा नावं मीं ठेंवी । मज भजतेया बोज बरवी ।
 न भजतेया दावी । योगियां जो ॥ ८७ ॥
 तेया आम्हां वेसन । आमचें तो निधान ।
 किंबहुना समाधान । तो मिले तैं ॥ ८८ ॥
 तेया लागि रूपा येणें । तेयाचेनि एथ असणें ।
 तेया लोण कीजे प्राणें । ऐसा पढियें ॥ ८९ ॥
 जो आत्मलाभा सारिखें । गोमटें काहिं चि ने दखे ।
 आणि भोगविशेषें । हरिषेजेना ॥ ९० ॥
 आपण चि विश्व जाला । तारि भेदभाऊ गेला ।
 हणौनि द्वेष दूर ठेला । जेया पुरुषा ॥ ९१ ॥

यो न हृष्यति न द्वेष्टि न शोचति न काङ्क्षति ।

शुभाशुभपरित्यागी भक्तिमान्यः स मे प्रियः ॥ १७ ॥

पैं आपुलें जें साचें । तें कल्पांति हिं न वचे ।
 हें जाणूनि गतांचें । न शोची जो ॥ ९२ ॥
 जेया परौतें नाहिं । तें जाला आपुलां ठांड ।
 या लागि काहिं । आकांक्षी ना ॥ ९३ ॥
 बोखटें ना गोमटें । या काइसेया ही न भेटे ।
 राति देऊ न घटे । सूर्यु जैसा ॥ ९४ ॥
 ऐसा बोधू चि केवळ । होउनियां निश्चळ ।
 यावरि भजनशील । माझां ठांड ॥ ९५ ॥
 तरि तेया ऐसें दुसरें । आम्हां पढियेंतें सोयरे ।
 नाहिं गा साचोकारें । तूझी आण ॥ ९६ ॥

समः शत्रौ च मित्रे च तथा मानापमानयोः

शीतोष्णसुखदुःखेषु समः संगविर्वाजितः ॥ १८ ॥

पार्थ जेयाचां ठांड । वैषम्याची परि नाहिं ।
 रिपुमित्रां दोन्हीं । सरिसा पाडु ॥ ९७ ॥

जो खांडावेया घाउ घाली । कां लावणी जेणें केली ।
या दोघां येकि चि साउली । वृक्ष जैसा ॥ ९८ ॥
नातारि इक्षुदंडु । पालितेया गोडु ।
गालितेया ही तो चि पाडु । येकु चि गा ॥ ९९ ॥
अरिमित्रासिं तैसा । अर्जुना जेया भाव ऐसा ।
मानापमानीं सरिसा । होंतु जाए ॥ २०० ॥
साइं रितुं समान । जैसैं कां हें गगन ।
तैसैं येक जि मान । शीतोष्णीं जेया ॥ १ ॥
दक्षिणोत्तर मारुता । मेरु जैसा पांडुमुता ।
तैसा सुखदुःखां प्राप्तां । मध्यस्तु जो ॥ २ ॥
माधुर्यें चंद्रिका । सरिसी चि राया रंका ।
तैसा जो सकलिकां । भूतां समु ॥ ३ ॥
आघवेयां येक । सेव्य जैसैं उदक ।
तैसैं जेयातें लोक । आसंसीति ॥ ४ ॥

तुल्यनिंदास्तुतिमौनी संतुष्टो येनकेनचित् ।

अनिकेतः स्थिरमतिर्भक्तिमान्मे प्रियो नरः ॥ १९ ॥

जो सबाह्यें संगु । सांडूनियां लागु ।
येकाकी असंगु । आंगिं सूनि ॥ ५ ॥
जो निंदेतें नेघे । स्तुतिंतें न श्लाघे ।
आकाशा न लगे । लेपु जैसा ॥ ६ ॥
तैसा निंदे आणि स्तुती । मानु करुनु येका पांती ।
विचारें प्राणप्रवृत्ती । जनिं मौनीं ॥ ७ ॥
साच लटिकें दोन्हीं । न बोलैल मौनि ।
भोगितां उन्मनीं । आराय ना ॥ ८ ॥
जो यथालाभें तोखे । अलाभें हिं न पारुखे ।
पाउसैं विण न सुके । समुद्र जैसा ॥ ९ ॥

आणि वायुसि येके ठांडे । बिहार जैसे नाहिं ।
 तैसा न धरी चि केहीं । आश्रयो जो ॥ २१० ॥
 हें विश्व चि माझें घर । ऐसी मति जेयाची स्थिर ।
 किंवहुना चराचर । आपण जाला ॥ ११ ॥
 एया बरि पार्था । माझां भजनीं आस्था ।
 तारि तेयातें मीं माथां । मुगुटु करीं ॥ १२ ॥
 उत्तमासि मस्तक । खालविजे हें काये कवतिक ।
 हा मानु करिति लोक । पायवणियां ॥ १३ ॥
 तरि श्रद्धावस्तूसि आदरु । करितां जाणिजे प्रकारु ।
 जरि होये श्रीगुरु । सदाशिव ॥ १४ ॥
 तारि हें असो आतां । महेशातें वानितां ।
 आत्मस्तुति करितां । संचारु असे ॥ १५ ॥
 येयालागि हें । म्हणितलें रमानाहें ।
 अर्जुना मी वाहें । सिरिं जेयातें ॥ १६ ॥
 जो पुरुषार्थसिद्धि चौथी । घेउनि आपुलां हातिं ।
 रिगाला भक्तिपंथीं । जगा देंत ॥ १७ ॥
 कैवल्याचा अधिकारी । सोडि बांधि मोक्षाची करी ।
 किं जलाचिया परीं । तलवट घे ॥ १८ ॥
 ह्यणौनि तो नमस्कारुं । तेयातें मुगुट करुं ।
 तेयाचे टांक धरुं । कांठिं आहीं ॥ १९ ॥
 तेयाचेया गुणाची लेणीं । लेवउं आपुलां वाणीं ।
 तेयाची कीर्ति श्रवणीं । आइकों आहीं ॥ २० ॥
 तो पाहावा हे डोहले । ह्यणूनि अचक्षू मज डोले ।
 हातिचेनि करकमलें । पूजीं जेयातें ॥ २१ ॥
 दो वरि दोनि । भुजा आलों घेउनि ।
 आलिंगावेया लागौनि । तेयाचें आंग ॥ २२ ॥

तेया संगचेनि सुरवाडें । आह्मां देहधरणें घडे ।
 किबहुना आवडे । निरोपमु ॥ २३ ॥
 तेया आह्मां मैत्र । येथ काइसें पां चित्र ।
 परि तेयाचें हिं चरित्र । आयिकति जे ॥ २४ ॥
 ते ही प्राणा परोते । आवडति हें निरुतें ।
 जे भक्तिचरित्रातें । आसंसीति २५ ॥

ये तु धर्म्यामृतमिदं यथोक्तं पर्युपासते ।

श्रद्धधाना मत्परमा भक्तास्ते तीव मे प्रियाः ॥ २० ॥

जें हें साद्यंत । सांधितलें तुज प्रस्तुत ।
 भक्तियोगसंमत । योगरूप ॥ २६ ॥
 मी प्रीतीतें करीं । कां मनीं सिरसा धरीं ।
 येवढी थोरी । जेया स्थिती ॥ २७ ॥
 ते हे गोठि रम्य । अमृताधारधर्म्य ।
 प्रेरीति प्रतीतिगम्य । आइकौनि जे ॥ २८ ॥
 परि निरोपिली जैसी । तिया स्थिति रमत मानसिं ।
 मग सुक्षेत्रिं जैसी । पेरणी जाली ॥ २९ ॥
 तारे श्रद्धा करुनि आदरें । जेयांचा ठांड विस्तारे ।
 जीविं जेयां थारे । अनुष्ठिती ॥ २३० ॥
 पार्था गा जर्गी । भक्तु तो चि योगी ।
 उत्कंठा तेयां लागि । सदा मज ॥ ३१ ॥
 तो तीर्थ तो क्षेत्र । जर्गी तो चि पवित्र ।
 भक्तिकथेसि मैत्र । जेयां पुरुषां ॥ ३२ ॥
 जो सुरसाहें सील । लोकललनलील ।
 प्रणतिप्रतिपाल । खेळु जेयाचा ॥ ३३ ॥
 जो भक्तवत्सल । प्रेमलप्रांजल ।
 सत्यसेतुसकल । कलानिधी ॥ ३४ ॥

आक्षिं करुं तेयाचें ध्यान । तो आमचें देवतार्चन ।
 तें बांचूनि आन । गोमटें न मनूं ॥ ३५ ॥
 तेया आह्मा वेसन । आमचें तो निधान ।
 किंबहुना समाधान । तो मिलें तो ॥ ३६ ॥
 प्रेमलाचेया वार्त्ता । जे अनुमोदित्ती पांडुसुता ।
 ते देखों परदेवता । आपुली जैसी ॥ ३७ ॥
 ऐसें निजजनानंदें । तेणें जगदादिकंदें ।
 बोलिलें मुकुंदें । संजयो ह्मणे ॥ ३८ ॥
 राया जो निजनिर्मलु । निष्कलु लोककृपालु ।
 शरणगतां स्नेहालु । शरण्य जो ॥ ३९ ॥
 जो धर्मकीर्त्तिदवलु । अगाध दातृत्वे सरलु ।
 अतिबलु प्रबलु । बलिबंधनु ॥ २४० ॥
 तो कृष्णुजी वैकुंठीचा । चक्रवर्त्ती निजाचा ।
 सांघे एरु दैवांचा । आइकतु असे ॥ ४१ ॥
 आतां एया वरी । निरोपित्ती परी ।
 संजयो ह्मणे अवधारी । धृतराष्ट्रातें ॥ ४२ ॥
 ते चि रसालकथा । मन्हाटिया प्रतीतीपंधा ।
 आणिलेल आस्था । अवधारिजो ॥ ४३ ॥
 ज्ञानदेउ ह्मणे तुह्मी । संत बोलगावेति हें मी ।
 पढविलां स्वामी । निवृत्तिनाथें ॥ २४४ ॥

ॐ ॥ तत्सदिति श्रीमद्भगवद्गीतासूपनिषत्सु ब्रह्मविद्यायां
 योगशास्त्रे श्रीकृष्णार्जुनसंवादे भक्ति-
 योगो नाम द्वादशोऽध्यायः ॥१२॥

॥ श्रीकृष्णार्पणमस्तु ॥

ज्ञानेश्वरी

अध्याय तेरावा

श्रीगणेशायनमः ॥

केलेयां स्मरण । सकल विद्यांचें अधिकरण ।
ते बंदू चरण । श्रीगुरुचे ॥ १ ॥
जेयांचेनि आठवे । शब्दसृष्टि आंगवे ।
सारस्वत आघवें । जीभेसि ये ॥ २ ॥
वक्तृत्व गोडपणें । अमृतातें पारु हणें ।
रस होंति उल्लगणे । अक्षरांचे ॥ ३ ॥
भावांचें अवतरण । अवतरवीति खुण ।
हाता चढे संपूर्ण । तत्वभेदु ॥ ४ ॥
श्रीगुरुचे पाए । हृदय गवसूनि ठाए ।
तैं एवढें भाग्य होए । उन्मेषासि ॥ ५ ॥

अर्जुन उवाच ॥

प्रकृतिं पुरुषं चैव क्षेत्रं क्षेत्रज्ञमेव च
एतद्वेदितुमिच्छामि ज्ञानं श्रेयं च केशव ॥ १ ॥
तेथ अर्जुनु हणें प्रकृतिपुरुष । क्षेत्रज्ञ आणि क्षेत्रविशेष ।
हें तुज पासाव अशेष । इच्छितु असें जाणों ॥ ६ ॥

श्रीभगवानुवाच ॥

इदं शरीरं कौन्तेय क्षेत्रमित्यभिधीयते ॥

एतद्यो वेत्ति तं प्राहुः क्षेत्रज्ञमिति तद्विदः ॥ २ ॥

तो नमस्कारं आतां । पितामहाचा पिता ।

लक्ष्मीयेचा भर्ता । ऐसे हाणे ॥ ७ ॥

पार्था परिसिजे । देह हें क्षेत्र हाणिजे ।

हें जाणें तो बोलिजे । क्षेत्रज्ञ गा ॥ ८ ॥

क्षेत्रज्ञं चापि मां विद्धि सर्वक्षेत्रेषु भारत ॥

क्षेत्रक्षेत्रज्ञयो ज्ञानं यत्तज्ज्ञानं मतं मम ॥ ३ ॥

तरि क्षेत्रज्ञ येथें । तो मां चि निरुतें ।

जो सर्व क्षेत्रांतें । संगोपुनु असे ॥ ९ ॥

आणि क्षेत्रक्षेत्रज्ञातें । जाणणें जें निरुतें ।

ज्ञान ऐसें तयातें । मानूं आह्मी ॥ १० ॥

तत्क्षेत्रं यच्च यादृक्च यद्विकारि यतश्च यत् ॥

स च यो यत्प्रभावश्च तत्समासेन मे शृणु ॥ ४ ॥

तरि क्षेत्र एणें नावें । शरीर जेणें भावें ।

हाणितलें तें आववें । सांगों आतां ॥ ११ ॥

हें क्षेत्र कां हाणिजे । कैसें हें कें उपजे ।

कवण कवणीं वाहिजे । विकारीं एथ ॥ १२ ॥

हें आंवुठ हात मोटकें । किं केवडे पां केतुकें ।

बरड किं पीकें । कवणाचें हें ॥ १३ ॥

इत्यादि सर्व । जे एयाचे प्रभाव ।

ते बोलिजति साजीव । अवधान दीजो ॥ १४ ॥

ऋषिभिर्बहुधा गीतं छंदोभिर्विविधैः पृथक् ॥

ब्रह्मसूत्रपदैश्चैव हेतुमद्भिर्विनिश्चितैः ॥ ४ ॥

पै या चि स्थला कारणे । श्रुती सदा बोवाणें ।
 तर्कु एणें चि ठीकरणें । तोंडौता केला ॥ १५ ॥
 चालितां हे चि बोली । दर्शनें सेवटा आलि ।
 तें चि नाहिं बुझावलि । अझुइं दंडें ॥ १६ ॥
 शास्त्रांचिये सोडरि के । विचारिलीं एणें चि एकें ।
 एयाचेनि एकवकें । जगासि वादू ॥ १७ ॥
 तोंडेंसि तोंडा न पडे । बोलेसि बोला न घडे ।
 एया गुंती बडबडे । त्राये जाली ॥ १८ ॥
 नेणों कोणाचें हें स्थल । परि कैसें अभिलाखाचें बल ।
 जें घोघरीं कपाल । पीटवीतसे ॥ १९ ॥
 नास्तिकां देयावेया तोंड । वेदांचें गाढें बंड ।
 तें देखौनि पाखंड । आन चि वाजे ॥ २० ॥
 ह्मणे तूं निर्मूल । लटकें वागजाल ।
 ना ह्मणसी तरि पोफल । घातले असे ॥ २१ ॥
 पाखंडाचेया कडे । नागिनिं लुंचिति मुडें ।
 नियोजिलीं वितंडें । ताला येति ॥ २२ ॥
 मृत्युबलाचेनि माजें । हें जाइल विग काजें ।
 तें देखौनि व्याजें । निगाले योगी ॥ २३ ॥
 मृत्यूसि आधाइलें । तिहिं निरंजन सेविलें ।
 यमदमाचे केले । मेले पुरे ॥ २४ ॥
 येणें चि क्षेत्राभिमानें । राज्य त्यजिळें ईशानें ।
 गुंति जीणौनि स्मशानें । वसों आदरिलीं ॥ २५ ॥
 ऐसिया पैजा महेशा । पांगुरणें दाही दिशा ।
 लांचकरु ह्मणौनि कोळिसा । कामु केला ॥ २६ ॥
 पै सत्त्वलोकनाथा । वदनें आलीं बळार्था ।
 तन्हीं तो सर्वथा । जाणे चि ना ॥ २७ ॥

एक क्षणति हें स्थल । जीवाचें चि समूल ।
 मग प्राणु हें कुल । तेयाचें एथें ॥ २८ ॥
 जें प्राणाचां घारिं । आंगें राबते भाऊ च्यारी ।
 आणि मना ऐसा आवरी । कुलवाडिकारु ॥ २९ ॥
 तेयातें इंद्रियबैलांची पेटी । न क्षणे अवसिपाहाटि ।
 विषयक्षेत्रीं आटि । काढी भली ॥ ३० ॥
 मग विधिची वाप चुकवी । अन्याईं विं वाहवी ।
 कुकर्माचा करवी । राबु जरि ॥ ३१ ॥
 तरि तेया चि सारिखें । असंभड पाप पीके ।
 जन्मकोडी दुःखें । भोगवी जीउ ॥ ३२ ॥
 नातारि विधिचेये वापे । सत्क्रिया विं आरोपे ।
 जन्मशतमपें । सुख चि मविजे ॥ ३३ ॥
 तवें एक क्षणति हें न्हये । हें जीवाचें न क्षणावें ।
 आमतें पूसावें । क्षेत्राचें इया ॥ ३४ ॥
 जीव एथ उखिता । वास्तिकरु वांटे जांता ।
 आणि प्राणु हा बलौता । क्षणौनि जागे ॥ ३५ ॥
 अनादि जे प्रकृति । सांख्य जीतें गांति ।
 क्षेत्र हे वृत्ति । तियेची जाण ॥ ३६ ॥
 आणि तियेतें चि आघवा । आथि घरमेलावा ।
 क्षणौनि वाहिवां । घरीं वाहे ॥ ३७ ॥
 बाह्यांचिये राहाटी । मुदल तीघः शृष्टी ।
 ते तियेचां पोटी । जाले गुण ॥ ३८ ॥
 रजोगुणु पेरी । तेतुलें सत्व सोंकरी ।
 एकलें तम करी । सावगणी ॥ ३९ ॥
 रचूनु महत्तत्वाचें खलें । मली एकें चि कालुगेनि पोळें ।
 तेथ अव्यक्ताची मिले । सांजे भली ॥ ४० ॥

तबं एकिं मतिवन्ती । या बोलाचिया खंती ।
 झणितलें एया चांथी । अर्वाचीना ॥ ४१ ॥
 हां हो परतत्वा आंतु । केउती प्रकृतीची मातु ।
 हा क्षेत्रवृत्तांतु । उगेयां आइकां ॥ ४२ ॥
 शून्यसेजसालिये । सुलीनतेचिये तूलिये ।
 नीद केली होती बलिये । संकल्पें येणें ॥ ४३ ॥
 तो अवसांत चेइला । उद्यमीं सदैउं भला ।
 झणौनि ठेवा जोडला । इछे सवें ॥ ४४ ॥
 निराळंबिची वाडी । त्रिभुवना एवडी ।
 हे तिथेचिया जोडी । रूपा आली ॥ ४५ ॥
 महाभूतांचे एकावट । सैरा वेंटालु उमाट ।
 भूतग्रामाचे आघाट । चिरिले च्यान्ही ॥ ४६ ॥
 यावरि आदिं । पंचवटिकांची बांधी ।
 बांधली होती प्रभेदिं । पांचभूतिकिं ॥ ४७ ॥
 कर्मा अकर्माचे गुंढे । घातले दोहिं कडे ।
 नपुंसकें बरडें । रानें केलें ॥ ४८ ॥
 तेथ येरिझारि लागि । जन्ममृत्यूंची सुरंगी ।
 सुवालली चांगी । संकल्पें एणें ॥ ४९ ॥
 मग अहंकारेंसिं एकावदी । करूनि जीविता अवधी ।
 वाहिलें बुद्धी । चराचर ॥ ५० ॥
 इया परि निराळीं । वाढे संकल्पाची डाली ।
 झणौनि तो मूली । प्रपंचा इया ॥ ५१ ॥
 ये मतमुगुतकिं । पढिगाइलें आणिकिं ।
 झणति हां हो विवेकी । तन्हीं तुळिं ॥ ५२ ॥
 परतत्वाचां गाविं । संकल्पाची सेज देखावी ।
 तारि कां पां न मनावी । प्रकृति तेयाची ॥ ५३ ॥

परि असो हें नव्हे । तुझी येया न लगावें ।
 आइकां आववें । सांघिजेल ॥ ५४ ॥
 तरि आकाशि कवणें । कोळि मेवांचि भरण ।
 अंतरिक्ष तारागणें । धरी कोण ॥ ५५ ॥
 गगनाचा तडवा । उभिला कोणें हाणावा ।
 वारा हिंडतु असावा । हें कोणाचें मत ॥ ५६ ॥
 हंख कवण पेरी । कोण समुद्र भरी ।
 पर्जन्याचिया करी । धारा कवण ॥ ५७ ॥
 तैसें क्षेत्र हें स्वभावे । अव्हांत्रीक कव्हणाचें न्हवे ।
 एथ वाहे तेया फावे । येरा तूटि ॥ ५८ ॥
 तव आणिकें एकें । खोदें ह्मणितलें नीकें ।
 तरि भोगिजे एकें । कालें जेवि ॥ ५९ ॥
 हें जाणों मृत्यु रागिठा । सिहाडेयाचा दरकुठा ।
 परि काइ वाजटां । पूरिजतसे ॥ ६० ॥
 जन्हीं एयाचा मारु । देखताति अनिवारु ।
 परि स्वमर्ति भरु । अभिमोनियां ॥ ६१ ॥
 महाकल्पा परीती । कव वाल्हुनि अवचिती ।
 सत्यलोकभद्रजाती । आंगीं वाजे ॥ ६२ ॥
 लोकपाल नीचनवे । दिग्गजमेळावे ।
 स्वर्गाचिये अडवे । रिगौनि मोडी ॥ ६३ ॥
 येरें एयाचेन आंगवातें । जन्ममृत्यूचिये गर्ते ।
 निर्जीवें होउनि भ्रमितें । जीवमृगें ॥ ६४ ॥
 निहाला पां केवडा । पसरूनियां चवडा ।
 करितसे माजिवडा । आकारगजु ॥ ६५ ॥
 ह्मणौनि कालाची सत्ता । हा वोळु निरुता ।
 ऐसेसे वादु पांडुमुता । क्षेत्रा लागि ॥ ६६ ॥

हे बहू उर्खाविखी । रिखीं केली नैमिषि ।
 पुराणें इये विखीं । मतपत्रिका ॥ ६७ ॥
 अनुष्ठुभादि छंदें । प्रबंधिं जियें विविधें ।
 तें पत्रालंबनमदें । करीत आमुई ॥ ६८ ॥
 वेदिचें ब्रह्मसूत्र । देखणेपणें पवित्र ।
 परि तेया ही हें क्षेत्र । नेणवे चि ॥ ६९ ॥
 आणिकिं आणिकिं बहुतिं । महाकवी हेतुमंतीं ।
 एया लागि मती । वेचिलिया ॥ ७० ॥
 परि ऐसें हें एवडें । कां अमुकेयाचें चि फुडें ।
 हें कोणहा हिं वरिपडें । होये चि ना ॥ ७१ ॥
 आतां एयावरि जैसें । क्षेत्र हें असे ।
 तुज सांगों तैसें । साद्यंत गा ॥ ७२ ॥

महाभूतान्यहंकारो बुद्धिरव्यक्तमेव च ॥

इंद्रियाणि दशैकं च पंच चंद्रियगोचराः ॥ ५ ॥

तरि महाभूतपंचकु । आणि अहंकारु एकु ।
 बुद्धि अव्यक्त दशकु । इंद्रियांचा ॥ ७३ ॥
 आणि मन हिं एकु । विषयांचा दशकु ।
 मुखदुःखद्वेखु । संघातु इछा ॥ ७४ ॥
 आणि चेतना धृति । एवं क्षेत्रव्यक्ति ।
 सांघितली तुज प्रति । आववी चि हे ॥ ७५ ॥
 आतां महाभूतें कवणें । कवण विषय कैसिं करणें ।
 हे वेगलालेपणें । एकैक सांघों ॥ ७६ ॥
 तरि पृथ्वी आप तेज । वायु व्योम गा बुझ ।
 सांघितलें बा तुज । महातत्त्वे ॥ ७७ ॥
 आणि जागतिये दशे । स्वप्न लपालें असे ।
 नातरि अवसे । चंद्र गूढ ॥ ७८ ॥

नातरि अप्रौढें बालकिं । तारुण्य राहे थोंकिं ।
 कां न फुलतां कलिकिं । आमोदु जैसा ॥ ७९ ॥
 किंबहुना काष्टि । वन्हि जेवि किरीटी ।
 तेवि प्रकृतिचां पोटी । गोप्यु जो असे ॥ ८० ॥
 जैसा ज्वरु धातुगतु । कुपथ्याचें मीस पांतु ।
 मग जालेयां आंतु । बाहिरि व्यापी ॥ ८१ ॥
 तैसी पांचां हिं गांठि पडे । जें देहाकारु घडे ।
 तें नाचवी चट्टंकडे । तो अहंकारु गा ॥ ८२ ॥
 आतां बुद्धि जे ह्यणिजे । ते ऐसां चिन्हि जाणिजे ।
 बोलिलें यदुराजें । आइकें सांघों ॥ ८३ ॥
 तरि कंदर्पाचेनि वलें । इंद्रियवृत्तिचेनि मेलें ।
 विभांडूनि येति पाले । विषयांचे ॥ ८४ ॥
 तो सुखदुःखाचा नागोवा । जेथ उगाणों लागे जीवा ।
 तेथ दोहींसि बरवा । पाडु जे धरी ॥ ८५ ॥
 हें सुख हें दुःख । हें पुण्य हें दोख ।
 हें मैल हें चोख । ऐसं जें निवाडी ॥ ८६ ॥
 जिये अधमोत्तम सूजे । सानें थोर बूझे ।
 जिया दीठी पारखिजे । विखो जीवें ॥ ८७ ॥
 जे तेजतत्वाची वृद्धि । जे सत्वगुणाची निधि ।
 जे आत्मेयां जीवाची संधि । वसवीतसे ॥ ८८ ॥
 अर्जुना ते जाण । बुद्धि गा संपूर्ण ।
 आतां आइक तूं उल्लखण । अव्यक्ताचें ॥ ८९ ॥
 पै सांख्याचां सिद्धांतिं । प्रकृति जे महामती ।
 ते चि येथ प्रस्तुतिं । अव्यक्त गा ॥ ९० ॥
 आणि सांख्ययोगमतें । प्रकृति परिसविली तूतें ।
 दोहों परि ची जेथें । विवंचिली ॥ ९१ ॥

तेथ दूजी जे जीवदशा । तिये नावं वीरेशा ।
 येथ अव्यक्त ऐसा । पर्या३० हा ॥ ९२ ॥
 तन्हीं पाहालेयां रजनी । तारा लोपति गगनी ।
 कां हारपति अस्तमानी । भूतक्रिया ॥ ९३ ॥
 कां देह गेलेयां पाठि । देहादिक किरीटी ।
 उपाधि लोपे पोटी । कृतकर्माचां ॥ ९४ ॥
 कां बीजमुद्रे आंतु । थोंके तरु समस्तु ।
 कां वस्त्रपणें तंतु । दशे राहे ॥ ९५ ॥
 तैसं सांडुनु स्थूलधर्म । महाभूतें भूतग्राम ।
 लया जांति सूक्ष्म । होउनि जेथ ॥ ९६ ॥
 अर्जुना तेया नावें । अव्यक्त हें जाणावें ।
 आतां आइक आघवें । इंद्रियभेद ॥ ९७ ॥
 तरि श्रवण नयन । त्वचा घ्राण रसन ।
 इयें जाणें ज्ञान । करणें पांचें ॥ ९८ ॥
 इये तत्वमेलापकिं । मुखदुःखाची उखीविखी ।
 बुद्धि करितसे मुखि । पांचें इहिं ॥ ९९ ॥
 मग वाचा आणि कर । चरण अधोद्वार ।
 अपायु हे प्रकार । पांचें आणिक ॥ १०० ॥
 कर्मेन्द्रिय ह्यणिपति । तियें इयें जाणिजति ।
 आइकें कैवल्यपति । सांगत असे ॥ १ ॥
 पै प्राणाची आंतोरी । क्रियाशक्ति जे शरीरी ।
 तियेची रिगिनिगि द्वारी । पांचें इही ॥ २ ॥
 एवं दाही करणें । सांगितलीं दे३० ह्यणे ।
 आतां परियस फुडेपणें । मन तें हें ॥ ३ ॥
 जें इंद्रियां आणि बुद्धी । माझारिलिये संधी ।
 रजोगुणाचां खांदीं । तरलत असे ॥ ४ ॥

नीलिमा अंबरी । कां मृगतृष्णालहरी ।
 तैसा वायां चि फाउरी । वावो जालें ॥ ५ ॥
 आणि शुक्रशोणिताचा सांधा । मिलतां पांचाचा बांधा ।
 वायुतत्व दशधा । एक चि जालें ॥ ६ ॥
 मग तें हीं दाहें भागीं । देहधर्माचां खेवर्गीं ।
 अधिष्ठिलें आंगीं । आपुलालां ॥ ७ ॥
 तेथ चांचल्य निखिल । एकलें ठेलें निढाल ।
 ह्मणौनि रजाचें बल । धरिलें तें ॥ ८ ॥
 तेथ बुद्धीसि बाहिरि । अहंकारावरि ।
 ऐसां टांई माझारि । बलियाविलें ॥ ९ ॥
 वायां हें नाव । यन्हवि कल्पना हे चि सावेव ।
 जेयाचेनि संगें जीव । दशा वस्तू ॥ ११० ॥
 जें प्रवृत्तीसि मूल । कामा जेयाचें बल ।
 जें अखंड मुण सल । अहंकारासिं ॥ ११ ॥
 जें इछेतें वाढवी । आशेतें चडावी ।
 जें पाठि पुरवी । जगासि येया ॥ १२ ॥
 द्वैत जेणें उठी । अविद्या जेणें लाठी ।
 जें इंद्रियांतें लोटी । विषयां माझि ॥ १३ ॥
 संकल्पित शृष्टि घडी । सर्वें चि विकल्पूनि मोडी ।
 मनोरथाचिया उतरडी । उतरी रची ॥ १४ ॥
 जें भूलिचें कुल्हार । वायुतत्वाचें अंतर ।
 बुद्धिचें द्वार । शांकललें जेणें ॥ १५ ॥
 तें गा किरीटी मन । एया बोला नाहिं आन ।
 आतां विषयाभिधान । भेटु आइक ॥ १६ ॥
 तरि स्परिसु आणि शब्दु । रूप रसु गंधु ।
 हा विवेकु पंचविधु । ज्ञानेंद्रियाचा ॥ १७ ॥

इहीं चि पांचैं द्वारों । ज्ञानासि पाय बाहिर ।
 जैसें कां हिरव चारों । भांभावे पशु ॥ १८ ॥
 मग स्वर वर्ण विसर्ग । अथवा स्वीकारु त्यागु ।
 चक्रमण उत्सर्ग । मलमूत्रांचा ॥ १९ ॥
 हे कर्मेन्द्रियांचे पाच । विषय गा साच ।
 जें बांधौनि मांच । क्रिया जे उठी ॥ १२० ॥

इच्छा द्वेषः सुखं दुःखं संघातश्चेतना धृतिः ॥

एतत्क्षेत्रं समासेन सविकारमुदाहृतं ॥ ६ ॥

ऐसे हे दाही । विषय इये देहीं ।
 आतां इछा ते ही । सांघिजेल ॥ २१ ॥
 तरि भूतललें आठवे । कां बोलें कानु झांकवे ।
 ऐसिया वरि चेतवे । जे वृत्ति गा ॥ २२ ॥
 इंद्रियां विषयांचिये भेटी । सरिसी चि वेगें उठी ।
 कामाचिया बाहुटी । धरूनियां ॥ २३ ॥
 जियेचेनि उठिलेपणें । मना सैव धावणें ।
 ना रिगार्थें तेथ करणें । तांडें सूति ॥ २४ ॥
 जिये वृत्तिचिया वाढी । बुद्धि होये वेडी ।
 विषई जेया गोडी । ते हे इछा ॥ २५ ॥
 आणि इछिलेया सांगडे । इंद्रियां आमिप न जोडे ।
 ऐसेयां डाऊ जो पडे । तो चि द्वेष ॥ २६ ॥
 आतां या वरि सुख । तें एंवविध देख ।
 जेणें एकें चि अशेख । विसरे जीउ ॥ २७ ॥
 मनें वाचा कायें । जें आपुली आण वायें ।
 देहस्मृतिची त्राये । मोडित जाये ॥ २८ ॥
 जेयाचेनि जालेपणें । पांगुळा होणें प्राणे ।
 सात्विकां दुणे । वरि हि लाभ ॥ २९ ॥

आघवियाचि इंद्रियवृत्ती । हृदयाचां एकांति ।
 थापट्टनि सुषुप्ती । आणि जें गा ॥ १३० ॥
 किंवहुना सोए । जीउ—आत्मेयांची लाहे ।
 तेथ जें होये । तेया नावं मुख ॥ ३१ ॥
 आणि ऐसी हे अवस्था । न जोडतां पार्था ।
 जीजे तेया नावं सर्वथा । दुःख जाणें ॥ ३२ ॥
 तें मनोरथभंगें होये । येर सिद्धी गेलें जाए ।
 हें दोनी चि उपाये । मुखदुःखासि गा ॥ ३३ ॥
 आतां असंगा साक्षिभूता । देहिं चैतन्याची सत्ता ।
 तिये नावं पांडुसुता । चेतना एथ ॥ ३४ ॥
 जे नखौनि केंसेवन्हीं । उभी लागे शरीरी ।
 जे तिहिं अवस्थांतरी । पालटे ना ॥ ३५ ॥
 मनबुध्यादि आघवी । जियेचेनि टवटवी ।
 प्रकृतिवनमाधवी । सदा चि जे ॥ ३६ ॥
 जडाजडीं अंशीं । जे राहाटि सरिसी ।
 ते चेतना गा तुजसीं । लटकें नाहिं ॥ ३७ ॥
 पै राउ परिवाण नेणे । आज्ञा चि परचक्र जीणे ।
 कां चंद्राचेनि परिपूर्णें । सिंधु भरति ॥ ३८ ॥
 नाना भ्रमकाचेनि सन्निधानें । लोह करी सचेतनें ।
 कां सूर्यसंगु जनें । चेष्टविजे ॥ ३९ ॥
 आगा मुखमेलेविण । पीलेयाचें पोखण ।
 करी जेबि निरीक्षण । कूर्मिचें ॥ ४० ॥
 पार्था तिया परि । आत्मसंगति इये शरीरी
 सजीवत्वाचा करी । उपेगु जडा ॥ ४१ ॥
 मग तियेतें चेतना । ह्यणिपे अर्जुना ।
 भृतिची विवंचना । आतां आइक ॥ ४२ ॥

तत्त्वां परस्परं । उघड जातिवैरं ।
 नव्हे पृथिवीयेतें नीरें । निनासिजे ॥ ४३ ॥
 नीरातें आटी तेज । तेजा वायुसिं जूझ ।
 गगन तवं साहाज । वायु भक्षी ॥ ४४ ॥
 तेविं चि कव्हणी वेले । आपण काइसेया ही न मिले ।
 आंतु रिगौनु वेगलें । आकाश हें ॥ ४५ ॥
 ऐसिं पांचै भूतें । न साहांति एकमेकातें ।
 किं ल्यें हिं ऐक्यातें । देहां यंति ॥ ४६ ॥
 द्वंद्वाची उखीविखी । सांडूनि वस्ती एकी ।
 एकातें पोखी । निजगुणें ॥ ४७ ॥
 ऐसें मिलतेयां साजणें । चले धैर्ये जेणें ।
 तेया नावं जेणे । भृति पै गा ॥ ४८ ॥
 आणि जावोंसि पांडवा । यां सतिसां सतिसांचा मेलावा ।
 तो पै येथ जाणावा । सांघातु गा ॥ ४९ ॥
 एवं सतीस भेद । सांवितले तुज विशद ।
 एयां एतुलेयांतें प्रसिद्ध । क्षेत्र ह्मणिजे ॥ १५० ॥
 रथांगाचा मेलावा । रथु ह्मणिजे पांडवा ।
 कां अधोर्ध्व अवयवां । नावं देह ॥ ५१ ॥
 करी—चातुरंग—समाजें । सेना नावं निफजे ।
 वाक्यें ह्मणिपति पुंजे । अक्षरांचे ॥ ५२ ॥
 जलधरांचा मेला । वाच्य होये अभाला ।
 नाना लोक सकला । नावं जगु ॥ ५३ ॥
 कां स्नेह—सूत्र—बन्दि । मेलु एकी स्थानीं ।
 धरिजे तो जनीं । दीपु होये ॥ ५४ ॥
 तैसिं सतीस हीं तत्वे । मिलति एकत्वे ।
 तेणें समूहपरत्वे । क्षेत्र ह्मणिजे ॥ ५५ ॥

आणि वाहंतेनि भौतिकें । पापपुण्य एथ पीके ।
 ह्यणौनि आक्षि कवतिकें । क्षेत्र ह्यणों ॥ ५६ ॥
 एकाचेनि मते । देह ह्यणति एयाते ।
 परि असो हें अनंतें । नावें एयासि ॥ ५७ ॥
 सुरनरउरगीं । घडत आहे योनिविभागि ।
 ते गुणकर्मसंगीं । पडिलें सातें ॥ ५८ ॥
 पै परतत्वा आरौतें । आणि स्थावरांता आंतौतें ।
 जें काहिं होतें जातें । क्षेत्र चि हें ॥ ५९ ॥
 हे चि गुणविवचना । पुढां ह्यणिपैल अर्जुना ।
 प्रस्तुत आतां ज्ञाना । रूप दाउं ॥ ६० ॥
 क्षेत्र तव सविस्तर । सांचितलें सविकार ।
 ह्यणौनि आतां उदार । ज्ञान आइक ॥ ६१ ॥

अमानित्वमदंभित्वमहिंसा क्षांतिराजवं ॥

आचार्योपासनं शौचं स्थैर्यमात्मविनिग्रहः ॥ ७ ॥

जेया ज्ञाना लागि । गगन गीलितति योगी ।
 स्वर्गिची आडवंगी । उमरुडूनि ॥ ६२ ॥
 न करीति सिद्धिचे पाड । न धरीति रिद्धीची भीड ।
 योगा ऐसें दुवाड । हेलासति ॥ ६३ ॥
 तपोदुर्गे वोलांडिति । क्रतुकोडी वोवांडिति ।
 उलयौनि सांडिति । कर्मवेली ॥ ६४ ॥
 नाना भजनमार्गि । धावतु उघडां आंगीं ।
 एक रिगति सुरंगीं । सूक्ष्मतेचिये ॥ ६५ ॥
 ऐसी जिये ज्ञानीं । मुनीश्वरां उतान्ही ।
 वेदतरुचां पानोवानीं । हीडताति ॥ ६६ ॥
 देईल गुरुसेवा । इया बुद्धी पांडवा ।
 जन्माचा सांडोवा । टाकिति जे ॥ ६७ ॥

जेयाची रिगवणी । अविद्ये उणें आणी ।
 जीवात्मेयां बुझावणी । मांडूनि दे ॥ ६८ ॥
 जें इंद्रियांचीं दारें अडी । प्रवृत्तिचे पाये मोडी ।
 जें दैन्य चि फेडी । मानसाचें ॥ ६९ ॥
 द्वैताचा दुकलु पाहे । साम्याचें सुवाण होये ।
 जेया ज्ञानाची सोये । ऐसें करी ॥ १७० ॥
 मदाचा ठाऊ पूसी । जें महामोहातें गिवसी ।
 नेंदी आपपरु ऐसी । भाख उरों ॥ ७१ ॥
 जें संसारातें उन्मूली । संकल्पपंकु पाखाली ।
 अनावरातें वेंटाली । ज्ञानतेजें ॥ ७२ ॥
 जेयाचेनि उजालें । उघडति बुद्धिचे डोले ।
 जीउ दोदावरि लोले । आनंदाचेया ॥ ७३ ॥
 ऐसें जें ज्ञान । पवित्रैकनिधान ।
 जेथ विटाललें मन । चोख कीजे ॥ ७४ ॥
 आत्मेयां जीवबुद्धि । जे हे लागली क्षयव्याधि ।
 ते जेयाचेया सन्निधी । बलि कीजे ॥ ७५ ॥
 तें अनिरूप्य किं निरूपिजे । आइकतां बुद्धी आणिजे ।
 वांचौनि डोलां देखिजे । ऐसें नाहिं ॥ ७६ ॥
 मग एकीं शरीरी । आपुली प्राची करी ।
 तें इंद्रियां व्यापारीं । दीठी ही दीसे ॥ ७७ ॥
 पै वसंताचें रिगवणें । झाडांचेनि साजेपणें ।
 जाणिजे तेवि करणें । सांघति ज्ञान ॥ ७८ ॥
 आगा वृक्षासि पातालीं । जल सांपडे मुल्लि ।
 तें शाखांचिया बाहाली । दीसे वरि ॥ ७९ ॥
 तां भूमिचें माईष्ट । सावे कोंभाची लवलव ।
 ज्ञाना आचार गौरव । सुकुलीचें ॥ १८० ॥

अथवा संभ्रमाचिया आयती । स्नेहो जैसा ए व्यक्ती ।
 कां दर्शनाचिया प्रशस्ती । पुण्यपुरुष ॥ ८१ ॥
 नातरि केलि कापुरु जाला । तो परिमलें जाणों आला ।
 कां भिंगारां दीपु ठेविला । बाहिरि फांके ॥ ८२ ॥
 तैसिं हृदइंचेनि ज्ञानें । जियें उमटति देहिं चिन्हें ।
 तियें सांघों अवधानें । चांगें आइक ॥ ८३ ॥
 तरि कव्हणी विखिचे । जीवा साम्य होणें न रुचे ।
 संभावितपणाचें । उज्जें जेया ॥ ८४ ॥
 आथिले चि गुण वानितां । कां मान्यपणें मानितां ।
 योग्यतेचें येतां । रूप आंगा ॥ ८५ ॥
 गजबजों लागे कैसा । व्याघ्रें रुंधला मृगु जैसा ।
 कां बाहिं उतरलां वलसां । दाटला जेवि ॥ ८६ ॥
 पार्था तेणें पाडें । सन्मानें जो सांकडे ।
 गरिमेतें आंगा कडे । येउं नेंदी ॥ ८७ ॥
 पूज्यता डोलां नेदखावी । स्वकीर्त्ति कार्नि नाइकावी ।
 हा अमुका ऐसी न व्हावी । से चि लोका ॥ ८८ ॥
 तेथ सत्काराची कें गोटी । कें आदरा होईल भेटि ।
 मरणेंसिं साठि । नमस्कारितां ॥ ८९ ॥
 वाचस्पतिचेनि पाडें । सर्वज्ञता तरि जोडे ।
 परि वेडिवे माजि दडे । महिमे भेण ॥ १९० ॥
 चातुर्य लपवी । महत्व हारवी ।
 पीसेपण मिरवी । आवडौनि ॥ ९१ ॥
 लौकिकाचा उद्वेगु । शास्त्रांवारि उभगु ।
 उगेपणिं चांगु । आथि भरु ॥ ९२ ॥
 जगें अवज्ञा चि कराव्हा । संबंधि सोये न धरावी ।
 ऐसी ऐसी जीवि । चाड बडूं ॥ ९३ ॥

तलैटेपण बाणे । आंगीं हीणा३० खेवणें ।
 तें तें चि करणें । बहुतकरुनु ॥ ९४ ॥
 हा जीतु ना नव्हे । लोक कल्पी येणें भावें ।
 तैसें जीणें होआवें । ऐसी आश ॥ ९५ ॥
 पैल चालत कां आहे । किं वारेनि जांत नोहे ।
 जना ऐसा भ्रमु जाए । ऐसेयां होइजे ॥ ९६ ॥
 माझें असतेपण लोपो । नामरूप हारपो ।
 मज झनें वासिपो । भूतजात ॥ ९७ ॥
 ऐसिं जेयाचि नवसियें । एकांता जात जाए ।
 नावें चि जो जिये । रानाचेनि ॥ ९८ ॥
 वायू आणि जेया पडे । गगनेंसिं बोलों आवडे ।
 जीउ प्राणु झाडें । पढियंति गा ॥ ९९ ॥
 किंबहुना ऐसिं ऐसिं । चिन्हें जेया देखसी ।
 जाण तेया ज्ञानेंसिं । सेस जालें ॥ २०० ॥
 पै अमानित्व पुरुषीं । जाणावें इहिं भिखिं ।
 आतां अदंभित्वाचिये ३० लखी । सौरसु करु ॥ १ ॥
 तारि अदंभित्व तें ऐसें । लोभियाचें मन जैसें ।
 जीउ जा३० परि नुमसे । ठेविला ठा३० ॥ २ ॥
 तेया परी किरीटी । पडिला ही प्राणसंकटीं ।
 परि सुकृत न प्रकटी । आंगें बोलों ॥ ३ ॥
 खडाणे आला पान्हा । पलवी जेवि अर्जुना ।
 कां राहे पण्यांगना । वडीलपणें ॥ ४ ॥
 आढ्यु आंतुडे अडविं । मग आढ्यता जेवि हारवी ।
 कां कुलवधू लपवी । अवेवांतें ॥ ५ ॥
 नाना कृषिवलु आपुलें । पांगुरवी पेरिलें ।
 तैसें झांकी निफनलें । दानपुण्य ॥ ६ ॥

वरि देह न पूजी । लोकातें न रंजी ।
 स्वधर्मु वाग्बीजि । बांधों नेणें ॥ ७ ॥
 परोपकारु नोबोले । न मिरवी अभ्यासिलें ।
 न शके विक्कू जेडिलें । स्फीतीसाठि ॥ ८ ॥
 आंगभोगा कडे । पाहांतां कृपणु आवडे ।
 यन्हविं धर्मविखीं थोडें । बहू न ह्मणे ॥ ९ ॥
 घरिं दीसैल सांकड । देहिची ही आइति रोड ।
 परि दानिं जेया होड । सुरतरूसिं ॥ २१० ॥
 किंबहुना धर्मि थोर । अवसरिं उदारु ।
 आत्मचर्चे चतुरु । यन्हविं वेडा ॥ ११ ॥
 केलिचें दलवाडें । हल्ल पोकल आवडे ।
 परि फलौनियां गाढें । रसाल जैसें ॥ १२ ॥
 कां मेघाचें आंगझील । दीसे वारेनि जैसें जाइल ।
 परि वरिखती नवल । घनवटीतें ॥ २१३ ॥
 तैसा जो पुण्यां । पातां धांति आणी ।
 यन्हविं तरि वाणी । तो चि ठाऊ ॥ १४ ॥
 हें असो एया चिन्हांचा । नडनाचु ठांइ जेयाचा ।
 जाण ज्ञान तेयाचा । हातु चढलें ॥ १५ ॥
 पै गा अदंभपण । ह्मणितलें तें हें जाण ।
 आतां आइक खूण । अहिंसेची ॥ १६ ॥
 तरि अहिंसा बहुवे परीं । बोलिली असे अवधारीं ।
 आपुलालां मतांतरिं । निरोपितां ॥ १७ ॥
 परि ते ऐसी देखां । जैसिया खांडूनियां शाखा ।
 मग तेया चि बुडुखा । कूपु कीजे ॥ १८ ॥
 बाहे तोडूनि विक्तिजे । मग भूखेची पीडा राखिजे ।
 नाना देउलें मोडूनि कीजे । पौले देवा ॥ १९ ॥

तैसी चि हिंसा करुनि अहिंसा । कर्मकांडिं हा ऐसा ।
 पूर्वमीमांसा । निर्णो केल ॥ २२० ॥
 जें अदृष्टिचेनि उपद्रवें । गादैल विश्व चि आघवें ।
 ह्मणौनि पर्जन्ययष्टि करावे । नाना याग ॥ २१ ॥
 तिये इष्टिचां बुडी । पशुहिंसा तव रोकडी ।
 मम अहिंसेची थडी । लेसां दीसे ॥ २२ ॥
 पेरिजे नुसदी हिंसा । तेथ आवैल काय अहिंसा ।
 परि नवलु वा धिवंसा । याज्ञिकांचा ॥ २३ ॥
 आणि आयुर्वेदु ही आघवा । एया चि मोहरा पांडवा ।
 जें जीवां कारणे करावां । जीवां घातु ॥ २४ ॥
 नव्हे रोगीं आहाललीं । लोलतीं भूतें देखिलीं ।
 ते हिंसा निवारावेया केली । चिकित्सिका ॥ २५ ॥
 तव चिकित्सा पहिलें । एकांचे कंद खणविले ।
 एकां उपडविलें । समूलांतें ॥ २६ ॥
 एकें आडमोडीं केलीं । अजंगमाची खाल काढविली ।
 गाभिणीं उकडलीं । पुटां माक्षि ॥ २७ ॥
 अजातशत्रुतुरुवरां । सर्वांगिं देवविलिया सिरा ।
 ऐसे जीव घेउनि वीरा । कोरडे केले ॥ २८ ॥
 आणि जंगमा हिं हात । लाउनि काढिलें पित्त ।
 मग राविले सीणत । आणिक जीव ॥ २९ ॥
 आहावसुवारें । मोडूनि केले देव्हारे ।
 नागवूनु वेव्हारे । गवांदि घातली ॥ ३० ॥
 मस्तक पांगुराविलें । तव तलवटीं उघडें ठेलें ।
 मागां मोडूनु केलें । पुढें धड ॥ ३१ ॥
 नाना पांगुरणें । जाळूनि जैसें तापणें ।
 नातरि जालें आंगधुणें । कुंजराचें ॥ ३२ ॥

बैलु वीकूनि कोठा । पूंस लाउनि गांठा ।
 इये करणी की चेष्टा । कायि हांसों ॥ ३३ ॥
 एकिं धर्माचिया वाहाणी । गाळूं आदरिलें पाणी ।
 तेथ गालितेयाचिया आहलणी । जीव मेले ॥ ३४ ॥
 एक न पचिति चि कण । इये हिंसे चि भेण ।
 तेथ कदर्थले प्राण । ते चि हिंसा ॥ ३५ ॥
 एवं हिंसा चि अहिंसा । कर्मकांडिं हा ऐसा ।
 सिद्धांतु सुमनसा । उलख तूं ॥ ३६ ॥
 पहिलें अहिंसेचें नाव । केलें आह्मि जवं ।
 तवं स्फूर्ति बांधली हाव । इये मतीं ॥ ३७ ॥
 तरि कैसेनि इयेतें गाळावें । हणौनि पडिलें बोलावें ।
 तेविं चि तुवां जाणावें । ऐसा भाऊ ॥ ३८ ॥
 बहूकरनि किरीटी । हा चि विषो इये गोटी ।
 यन्हविं कां आडवाटी । धांविजेल ॥ ३९ ॥
 आणि स्वमताचिया निर्झारा । लागौनियां धनुर्झरा ।
 प्राप्ता मतांतरा । निर्वचु कीजे ॥ ४० ॥
 ऐसी हे अवधारीं । निरोपिती परी ।
 आतां यावरी । मुख्य जें गा ॥ ४१ ॥
 तें स्वमत बोलिजेल । अहिंसे रूप कीजेल ।
 जेया उठविलेयां आंतुल । ज्ञान दीसे ॥ ४२ ॥
 परि तें चि अधिष्टिलेनि आंगें । जाणिजे आचरतेनि बागें ।
 जैसी कसवटी सांवे । वानियेतें ॥ ४३ ॥
 तैसें ज्ञानामनाचिये भेटी । अहिंसेचें बिंब उठी
 तें चि ऐसें किरीटी । परिस आतां ॥ ४४ ॥
 तरि तरंग नोलांडितु । लहरी पायें न फेडितु ।
 संचळ न मोडितु । पाणिषांचा ॥ ४५ ॥

वेगें आणि लेसां । दीठि घाल्नि आर्विसा ।
 जलिं बकु जैसा । सोंए ॥ ४६ ॥
 कां कमलावारि भवर । पाये ठेविति हलुवार ।
 कुचुंबैल केसर । इया शंका ॥ ४७ ॥
 तैसे परिमाणु पांगुतले । जाणौनि जीउ सानुले ।
 कारुण्या माझि पाउलें । लपौनि चाले ॥ ४८ ॥
 ते वाट कपेची कारितु । ते दिशा चि स्नेहें भारितु ।
 जीवा तलिं आंथुरितु । आपुला जीउ ॥ ४९ ॥
 ऐसिया जतना । चालणें जेया अर्जुना ।
 हें अनिर्वाच्य परि मना । पूरिजे ना ॥ २५० ॥
 पै मोहाचेनि सांगडें । लांसि पीलें धरी तोंडें ।
 तेथ दातांचें आगरडें । जैसें लागे ॥ ५१ ॥
 कां स्नेहाळ माए । तान्हेयांची वास पाहे ।
 तिये दीठी आहे । हलुवार जें ॥ ५२ ॥
 नाना कमलदलें । डोलवीजिजति ढालें ।
 तो जेणें पाडें बुबुलें । वारा घेपे ॥ ५३ ॥
 तैसेनि माईवें पाए । भूमी ठेवीतु जाये ।
 लागति तेथ होये । जना सुख ॥ ५४ ॥
 ऐसिया लघिमा चालता । क्रिमिकीटक पांडुसुता ।
 देखे तारि माघौता । हलू चि निगे ॥ ५५ ॥
 ह्मणे पाउं दडफडील । निद्रा स्वामिची मोडैल ।
 रचलेपणा पडैल । शोति हान ॥ ५६ ॥
 इया काकुलती । वाहाणि घे माघौति ।
 कोणही हिं व्यक्ती । न वचवे वारि ॥ ५७ ॥
 जीवाचेनि नावें । तृण हिं नोलांडावें ।
 मग नलेखितां जावें । हें कें गोठि ॥ ५८ ॥

मुंगिये मेरु नोलांडवे । मशका सिंधु नुतरवे ।
 तैसें भेटलें न करवे । अतिक्रमूं ॥ ५९ ॥
 ऐसी जेयाची चुचालिं । क्रियाफलासि आली ।
 देखसी जियाली । दया वाचे ॥ २६० ॥
 स्वसर्णे चि तें सकुमार । मुख मोहाचें माहियेर ।
 माधुर्या जाले अंकुर । दशन तैसे ॥ ६१ ॥
 पुढां स्नेह पांझरे । मागां चालति अक्षरें ।
 शब्दु पाठि अवतरे । कृपा आधीं ॥ ६२ ॥
 तव बोलणें चि नाहीं । भिये ह्मणे जरी काहिं ।
 बोलु कोणहा हिं । खुपेल कां ॥ ६३ ॥
 बोलतां अधिकु ही निगे । तरि कोणहां वर्मी हान लागे ।
 कोणहासि रिगे । शंका मनीं ॥ ६४ ॥
 मांडली गोटी हान मोडेल । वासिपेल कव्हणी उडेल ।
 आइकीं चि वोवांडिल । कोणहीं जरी ॥ ६५ ॥
 तरि दुवालि कोणहा न व्हावी । कोणहाची भंवै नुचलावी ।
 ऐसा भाऊ जीविं । ह्मणौनि उगा ॥ ६६ ॥
 मग प्रार्थिला विपाएं । जरि लोभें बोलें जाए ।
 तरि परियस तेयां होए । मायबापु ॥ ६७ ॥
 नादब्रह्म मूर्छलें । गंगापय आसललें ।
 पतिव्रते आलें । वृद्धाप्य कां ॥ ६८ ॥
 तैसी साच आणि मौवाल । सीतली आणि रसाल ।
 बोल जैसे कळोल । अमृताचे ॥ ६९ ॥
 उरोधु वाडुवल्ल । प्राणुपापता ढाल्ल ।
 उपहासु चाल्ल । वर्मस्पर्शु ॥ २७० ॥
 आंवु वेगु विंदाण । आश शंका प्रतारण ।
 हे संन्यासिले अवगुण । जेया वाचा ॥ ७१ ॥

आणि तेया चि परी किरीटी । थाउं जियाचिया दीठी ।
 सांडिलिया भृकुटी । मोकलिया ॥ ७२ ॥
 भूति वस्तु आहे । तिये रूपों सके विपायें ।
 ह्यणौनि वास ना पाहे । बहुत करुनि ॥ ७३ ॥
 ऐसा ही कोणही एकी वेले । आंतुली कृपेचेनि बलें ।
 उचलूनियां डोले । दीठी घाली ॥ ७४ ॥
 तरि चंद्रबिंबौनि धारा । सूटति नव्हंति गोचरा ।
 परि एकसरि चकोरां । निगति दोंदें ॥ ७५ ॥
 तैसें प्राण्यांसि होए । जरि तो वास पाहे ।
 तेया अवलोकनाची सोए । कूर्मी हीं नोहे ॥ ७६ ॥
 किंबहुना ऐसी । दीठि जेया भूतांसि ।
 कर ही देखसी । तैसे चि गा ॥ ७७ ॥
 होउनियां कृतार्थ । राहिले सिद्धांचे मनोरथ ।
 तैसे जेयाचे हात । निर्व्यापार ॥ ७८ ॥
 अक्षम आणि सन्यासिलें । निरंधन आणि विज्ञालें ।
 मूकेनि घेतलें । मौन जैसें ॥ ७९ ॥
 तिया परिं काहिं । जियां करां करणें नाहिं ।
 जें अकस्तेयाचां ठाईं । बैसउं एंती ॥ ८० ॥
 आसुडेल हान वारा । नख लागेल अंबरा ।
 इया बुद्धी करां । चलें नेंदी ॥ ८१ ॥
 तेथ आंगावरिलें उडारिं । कां डोलां रिगतें झाडाविं ।
 पशुपक्षां दावावी । त्रासमुद्रा ॥ ८२ ॥
 इया केउतिया गोठी । नावडे दंडुकाठी ।
 मग शस्त्रांचें किरीटी । बोलणें कें ॥ ८३ ॥
 लीलाकमलें खेलणें । पुष्पमाला झेलणें ।
 न करी झणे गोफणें । ऐसें होइल ॥ ८४ ॥

हालवती रोमावली । या लागि आंग न कुरुवाली ।
 नखांची गुंडालि । बोटां वरि ॥ ८५ ॥
 तव् करणेयांचा चि विपाउ ॥ जरि ऐसा ही पडे ठाउ ॥
 तरि हातां हा चि स्वभाउ ॥ जें जोडिजति ॥ ८६ ॥
 कां नाभिकारा उभिजे । हातु पडिलेयां दीजे ।
 आर्तातें परिसिजे । अलुमालु ॥ ८७ ॥
 हें इ उपरोधें करणें । आर्त्ति भय हरणें ।
 नेणति चंद्रकिरणें । जीवाला तो ॥ ८८ ॥
 पाहूनि तो स्पर्शु । मलयानीलु खरपुसु ।
 एणें मानें पशु । कुरुवाळणें ॥ ८९ ॥
 जियें सदा रीति पोकलें । जैसि चंदनांगें शीतलें ।
 न फलतां हि निष्फलें । होंति चि ना ॥ ९० ॥
 असो हें वागजाल । जाणिजे करतल ।
 सज्जनाचें सीतल । स्वभावे जेंसें ॥ ९१ ॥
 आतां मन तेयाचें । सांघों ह्मणे साचें ।
 तरि सांघितलें कोणाचे । विलास हे ॥ ९२ ॥
 काइ शाखा नव्हे तरु । जलें विण असे सागर ।
 तेज आणि तेजकरु । सिनानी आधि ॥ ९३ ॥
 अथेव आणि शरीर । हें वेगजालें जर ।
 किं रसु आणि नीर । सिनानीं आधि ॥ ९४ ॥
 ह्मणौनि जे हे सर्व । सांघितले बाह्य भाव ।
 तें मन चि गा सावेव । ऐसें जाण ॥ ९५ ॥
 जें बिं भुइं खोषिलें । तें चि वरि रुख जाले ।
 तैसें इंद्रियद्वारीं फांकलें । अंतरिचें ॥ ९६ ॥
 पै मानसि जरि । अहिंसेची अवसरी ।
 तरि कैची बाहिरि । बोसंडैल ॥ ९७ ॥

आवडे ते वृत्ति किरीटी । आधि मनौनि उठी ।
 मग वाचे दीठी । करांसि ये ॥ ९८ ॥
 वांचूनि मनीं नाहि । तें आंगि उमटेल काइ ।
 बीजें विण सुइ । अंकुरु असे ॥ ९९ ॥
 उगाविं चि बालौनि जाए । तें अधि कैचें वाहे ।
 जीउ गेलेयां आहे । चेष्टा देहिं ॥ १०० ॥
 तैसें मनपण जें मोडे । तें इंद्रियां आधीं चि उबडे ।
 सूत्रें विण साईखडें । वाउ जैसें ॥ १ ॥
 हणौनि मन पांडवा । मूल एयां इंद्रियभावां ।
 हें चि राहाटे आघवां । द्वारिं इहिं ॥ २ ॥
 परि जिये वेले जैसें । जें होउनि आतुं असे ।
 बाहिरि ये तैसें । व्यापाररूपें ॥ ३ ॥
 यालागि साचोकारें । मनीं अहिंसा थावे थोरें ।
 पै कलि जैसी द्वारें । ओबांत निगे ॥ ४ ॥
 हणौनि इंद्रियें ते संपदा । वेंचितां हिं उदावादा ।
 अहिंसेचा बांधा । करितें आहाति ॥ ५ ॥
 समुद्र दाटी भरितें । तें समुद्रू चि करी खारियांतें ।
 तैसें स्वसंपत्ति चित्तें । इंद्रियां केलें ॥ ६ ॥
 हें बहु असो पंडितु । धरुनु बालकाचा हातु ।
 बोलि लेहे वेगवंतु । आपण चि ॥ ७ ॥
 तैसें दयालुत्व आपुलें । मनें हातां पायां आणिलें ।
 मग तेथ उपजविलें । अहिंसेतें ॥ ८ ॥
 याकारणें किरीटी । इंद्रियांचिया गोठी ।
 मनाचिये चि राहाटी । रूप केलें ॥ ९ ॥
 ऐसा मनें देहें वाचा । सर्व संन्यासु दंडाचा ।
 जाला ठाई जेयाचां । देखसील ॥ ३१० ॥

तो जाण वेल्हाल । ज्ञानाचें वेलाउल ।
 हें असो निखल । ज्ञान चि तो ॥ ११ ॥
 जे अहिंसा कानि आइकिजे । ग्रंथाधार निरोपिजे ।
 ते पाहावी हें उपजे । तें तो चि पाहावा ॥ १२ ॥
 ऐसें ह्मणितलें देवें । तें बोलें एके सांवाथें ।
 परि फांकला हें उपसाहाथें । तुह्मीं मज ॥ १३ ॥
 ह्मणाल हिरव चारिवें गोहं । विसरे मोहर धरं ।
 कां वारेलगें पाखिरं । गगनीं भरे ॥ १४ ॥
 तैसा प्रमेयाचिया स्फूर्ती । फावल्या रसवृत्ती ।
 वाहविलां मती । अलुमालु ॥ १५ ॥
 तरि तैसें नव्हे अवधारां । कारण असे विस्तारा ।
 एन्हविं पद तरि अक्षरां । तिहिंचें चि ॥ १६ ॥
 अहिंसा ह्मणतां थोडी । परि तें चि होये उघडी ।
 जें आलोडिजति कोडी । मतांचिया ॥ १७ ॥
 यन्हविं प्राप्ते मतांतरे । थायवूनि आंगभरें ।
 बोलिजेल तें न सरे । तुह्मा पासि ॥ १८ ॥
 रत्नपारिख्याचां गाविं । जाईल गंडी तरि सोडावी ।
 काश्मिरीं न करावीं । मढंगणें ॥ १९ ॥
 इछा वासु कापुरा । मंद जेथ अवधारां ।
 पिठाचा विकिरा । तिये सांते ॥ २० ॥
 ह्मणौनि इये सभे । बोलिकेपणाचेनि क्षोभें ।
 लागसर न लभें । बोलें प्रभू ॥ २१ ॥
 सामान्य आणि विशेषा । सकलव कीजेल देखां ।
 तरि कानाचेया ही मुखी । कडे नेनां तुह्मीं ॥ २२ ॥
 शंकेचेनि गदलपणें । जें शुद्ध प्रमेय मैलणें ।
 मागुत वाउलीं पलवणें । अवधान यंतें ॥ २३ ॥

करुनि बाबुलियेची वूथि । जलें जियें ठाति ।
 तेयांची वांस पाहाती । हंस काई ॥ २४ ॥
 कां अभ्रा पैलीकडे । येत चांदिणें कोंडे ।
 तें चकोर चांचुवडे । पसरीति ना ॥ २५ ॥
 तैसें तुहिं वास न पाहाल । ग्रंथु नेघा वरि कोपाल ।
 जरि निर्वेवादां नव्हेल । निरोपण ॥ २६ ॥
 न बुझावति मते । न फीटे आक्षेपाचें लागतें ।
 तें वाखाणें जी तुमते । जोडुनु नेंदीं ॥ २७ ॥
 आणि माझे तवें आघवें । ग्रंथायंत एणें विभावें ।
 जें तुहिं संति होआवें । सन्मुखां सदा ॥ २८ ॥
 यन्हुविं तन्हीं साचोकारें । तुहिं गीतार्थाचे सोयरे ।
 जाणौनि गीता जीवसरें । धरिली मियां ॥ २९ ॥
 जें आपुलें सर्वस्व देयाल । मग इयेंतें सोडवूनु नेयाल ।
 क्षणौनि ग्रंथु नव्हे वोल । साच चि हे ॥ ३० ॥
 कां सर्वस्वाचा लोभु धरा । वोलेंचा अव्हेरु करा ।
 तरि गीते मज अवधारां । एकी चि गति ॥ ३१ ॥
 किंबहुना मज । तुमचिया कृपा काज ।
 तिये लागौनि व्याज । ग्रंथाचें केलें ॥ ३२ ॥
 तरि तुह्मां रसिकां जोगें । वाखाण शोधावें लागे ।
 क्षणौनि मतांगें । बोलों ठेलां ॥ ३३ ॥
 तवें कथे पसरु जाला । श्लोकार्थु दूरि ठेला ।
 कीजो क्षमा या वोल । अपस्य मज ॥ ३४ ॥
 आणि घांसांतूळु हरळु । फडितां लागे वेळु ।
 तें दूषण नव्हे आडळु । सांडावा किं ॥ ३५ ॥
 सवंचोर चूकवितां । दीस लागलेयां माता ।
 कोपावें किं जीविता । जीताणें कीजे ॥ ३६ ॥

परि या वरिल हें नव्हे । तुझि उपसाहिलें तें बरवें ।
 आतां अवधारां जी देवें । बोलिलें ऐसें ॥ ३७ ॥
 ह्मणे उन्मेखमुलोचना । सावधु होई अर्जुना ।
 करूं तुज ज्ञाना । बोलखि पाडूं ॥ ३८ ॥
 परि ज्ञान गा तेथें । बोलख तूं निरुतें ।
 आक्रोशें विण जेथें । क्षमा आथि ॥ ३९ ॥
 अगाधें सरोवरि । कमलिनी जेया परीं ।
 कां सदैवांचां घरीं । संपती जैसी ॥ ३४० ॥
 पार्था तेणें पाडें । क्षमा जेयातें वाढे ।
 तें हिं लक्ष फुडें । लक्षण सांघों ॥ ४१ ॥
 तरि पढियतें लेणें । आंगि भावे जेणें ।
 धरिजे तेवि साहाणें । सर्व चि जेया ॥ ४२ ॥
 त्रिविध मुख्य आघवे । उपद्रवांचे मेळावे ।
 वरिपडिलेयां न्हवे । वांकुडा जो ॥ ४३ ॥
 अपेक्षित पावे । तो जेणें तोखें मानवे ।
 अनपेक्षिता ही करावें । तो चि मानु ॥ ४४ ॥
 जो मानापमानातें साहे । सुखदुःख जेथ माये ।
 निंदास्तुती नोहे । दुखंडु जो ॥ ४५ ॥
 उन्हालेनि जो न तपे । हेमवंतीं न कंपे ।
 काइसेया ही न वासिपे । पातलेयां ॥ ४६ ॥
 स्वशरीराचा भारु । नेणे जैसा मेरु ।
 कां धरा इया सूकरू । बोझें न ह्मणे ॥ ४७ ॥
 नाना चराचरीं भूतीं । दाटणी नव्हे इये क्षिती ।
 तैसा नाना द्वंद्वप्राप्ती । घामेजे ना ॥ ४८ ॥
 वेउनु जलाचे संघाट । आलेयां नदीचे लोट ।
 करी वाट पोटा । सिंधु जेवि ॥ ४९ ॥

तैसें जेयाचां ठांडं । न साहणें काहीं चि नाहिं ।
 आणि सात असे ऐसें हिं । स्मरे ना जो ॥ ३५० ॥
 आंगा जें पातलें । तें करुनि घाली आपुलें ।
 तेथ साहंतेनि नवलें । घेपिजे ना ॥ ५१ ॥
 हे अनाक्रोश क्षमा । जेयातें आथि प्रियोत्तमा ।
 जाण तेणें महिमा । ज्ञानासि गा ॥ ५२ ॥
 तो पुरुष पांडवा । ज्ञानाचा उल्लावा ।
 आतां परियस आर्जवा । रूप करुं ॥ ५३ ॥
 तरि आर्जव तें ऐसें । प्राणाचें सौजन्य जैसें ।
 आवडतेया हीं दोसें । एक चि गा ॥ ५४ ॥
 कां तोंड पाहूनि प्रकाशु । न करी जेवि चंडांशु ।
 जगा एकू चि अवकाशु । आकाशातें ॥ ५५ ॥
 तैसें जेयाचें मन । मानुषप्रति आनान ।
 नाहिं आणि वर्त्तन । ऐसें पै तें ॥ ५६ ॥
 जें जग चि सनोलख । जगेंसि चि सोयेरिक ।
 आपपरु हे भाष । जाणणें चि नाहिं ॥ ५७ ॥
 भळेतेणेंसि मेलु । पाणियां ऐसा ढालु ।
 कोणही हि विखीं आडलु । नेघे चित्त ॥ ५८ ॥
 वारेयाची धावं । तैसे सरल भाव ।
 शंका आणि हावं । नाहिं जेया ॥ ५९ ॥
 माये पुढां बालका । रिगतां न पडे चि आवांका ।
 तैसें मन देतां लोका । नालोची जो ॥ ३६० ॥
 प्रकटलेया इंदीवरा । परिवरु नाहिं धनुर्द्धरा ।
 तैसा कोनकोपरा । नेणे जीउ ॥ ६१ ॥
 चोखालपण रत्नाचें । रत्नावरि नाचे ।
 तैसें पुढां मन जेयाचें । करणें पाठि ॥ ६२ ॥

आलोंचु जो नेणे । अनभिज्ञ जोगावणें ।
 धरी मेलीसि करणें । नाहिं जेया ॥ ६३ ॥
 दीठि नोहे मिणधी । देखणा नाहिं संधी ।
 कोणहासि ही बुद्धी । राहाटों नेणे ॥ ६४ ॥
 दाही इंद्रियें प्रांजलें । निःप्रपंचें उवलें ।
 पांचै पालव मोकले । आठै पाहार ॥ ६५ ॥
 अमृताची धार । तैसें उजू अंतर ।
 किंबहुना माहेर । यां चिन्हांचें ॥ ६६ ॥
 तो पुरुषु सूभटा । आर्जवाचा आंगवटा ।
 जाण तेथ चि घरटा । ज्ञानें केला ॥ ६७ ॥
 आतां या वरि । गुरुभक्तिची परी ।
 सांघों अवधारीं । चतुरनाथा ॥ ६८ ॥
 आघवेया चि दैवां । जन्मभूमि जे सेवा ।
 जे ब्रह्म करी जीवा । शोच्यते ही ॥ ६९ ॥
 ते आचार्यउपासित । सांविजैल तुज प्रति ।
 बैसो सहस्रा एका ची पांती । अवधानाची ॥ ७० ॥
 तरि सकलजलसमृद्धी । गंगा रिगाली उदधी ।
 कां श्रुति हे महापदीं । पैठी जाली ॥ ७१ ॥
 नाना वेंटाळनु जीवितें । गुणावगुण उखिते ।
 प्राणनाथा उचितें । दीन्हलें प्रिया ॥ ७२ ॥
 तैसें सबाह्य आपुलें । जेणें गुरुभक्ती दीधलें ।
 आपणपें केलें । भक्तिचें घर ॥ ७३ ॥
 गुरुगृह जिये देशीं । तो देशु चि आहे मानसि ।
 विरहिणी जैसी । वल्लभातें ॥ ७४ ॥
 तिये कडौनु येंतु वारा । देग्वौनु धावे सामोरा ।
 आडपडे क्षणे घरा । बीजें कीजे ॥ ७५ ॥

साच प्रेमाचिया भूली । तिया दिशा चि बोवाली ।
 जीउ धानापति करुनु घाली । गुरुगृहिं जो ॥ ७६ ॥
 गुरुआज्ञा धरलें । देह गाविं असे एकलें ।
 वांसुरुवां लाविलें । दावें जैसैं ॥ ७७ ॥
 ह्मणे कै हें बिरडें फीटैल । कै तो स्वामि भटैल ।
 युगा ही होन वडिल । निमिष मानी ॥ ७८ ॥
 ऐसैं गुरुप्राप्तिके आलें । कां स्वयं गुरु चि धाडिलें ।
 तरि गतायुषा जोडलें । आयुष्य जैसैं ॥ ७९ ॥
 कां सुकतेया अंकुरा । वरि पडिलेयां पीयूखधारा ।
 कां निर्जलिचा सागरा । आला मळु ॥ ८० ॥
 नातरि रंकें निधान देखिलें । आंधलेया डोले उघडले ।
 भणगाचेया आंगा आलें । इंद्रपद ॥ ८१ ॥
 तैसैं गुरुकुलिचेनि नावें । महासुखें थोरावे ।
 जें कोडिं हिं न पोडलवे । आकाशाचां ॥ ८२ ॥
 पै गुरुकुलिं ऐसी । भक्ति जेया देखसी ।
 जाण ज्ञान तेया पासिं । पाइकया असे ॥ ८३ ॥
 आणि अभ्यंतरिली कडे । प्रेमाचेनि पवाडें ।
 श्रीगुरुचें रूपडें । उपासी ध्यानीं ॥ ८४ ॥
 हृदयशुद्धिचां आवारीं । आराध्य तें घूर करी ।
 मग सर्वभावेंसिं परिवारीं । आपण होए ॥ ८५ ॥
 कां चैतन्याचिया पवली । माझि आनंदाचां राडलिं ।
 गुरुलिंगा ढाली । ध्यानामृत ॥ ८६ ॥
 उदैजतां बोधार्का । बुद्धिची डाल सात्विका ।
 भरौनि दे त्र्यंबका । लाखौली तेया ॥ ८७ ॥
 शुद्धि त्रिकालिं । जीवदशा धूपु जाली ।
 ज्ञेयदीपें उज्वाली । निरंतर ॥ ८८ ॥

समरस्याची रससोय । अखंड अर्पीतु जाए ।
 आपण भराडा होए । गुरुतें लिंगा ॥ ८९ ॥
 नातरि जिवाचिये सेजे । गुरु कांतु करुनु मुंजे ।
 ऐसि प्रेमाचिं भोजें । बुद्धि वाहे ॥ ९० ॥
 कोणही एकीं अवसरि । अनुरागु भरें अंतरीं ।
 किं तेया नावें करी । क्षीराब्धि ॥ ९१ ॥
 तेथ ध्यान बहुमुख । ते शेष तुलई निर्दोष ।
 वरि जलसेनु देख । भावी गुरु ॥ ९२ ॥
 बोलगती पाए । लक्ष्मी आपण होए ।
 गरुड होउनु राहे । आपण चि ॥ ९३ ॥
 नाभी आपण जन्मे । ऐसी गुरुमूर्ति प्रेमें ।
 अनुभवी मनोधर्मे । ध्यानसुखें ॥ ९४ ॥
 एकोधिये वेले । गुरु माये करी भावबलें ।
 मग स्तन्य उत्सर्गि लोले । अंका वरि ॥ ९५ ॥
 नातरि गा किरीटी । चैतन्यतरूतलवटीं ।
 गुरुधेनु आपण पाठिं । वत्स होए ॥ ९६ ॥
 गुरुस्नेहसलीलीं । आपण होये मासली ।
 कोणही एकी वेलीं । हें चि भावी ॥ ९७ ॥
 गुरु आमृताचें वडप । आपण होये लाहालाहात रोप ।
 ऐसेसे संकल्प । विये मन ॥ ९८ ॥
 चक्षुपक्षि विण । पीलु होये आपण ।
 ऐसें पै अपारपण । आवडिचें ॥ ९९ ॥
 गुरुतें पक्षिणी करी । चाराचारी चांतु वेन्हीं ।
 गुरु तारुं कास धरी । आपण जलीं ॥ १०० ॥
 ऐसें प्रेमाचेनि थावें । ध्यान चि ध्यानातें प्रसवे ।
 पूर्ण सिंधू हेलावे । सूटति जैसे ॥ १ ॥

किंबहुना इया परीं । गुरुमूर्ति अंतारिं ।
 भोगी आतां अवधारीं । बाह्य सेवा ॥ २ ॥
 तरि जीवीं ऐसे आवांके । ह्मणे दास्य करी न नीकें ।
 जवं गुरु कवतिकें । माग ह्मणति ॥ ३ ॥
 तैसिया साचा उपास्ती । गोसांविं प्रसन्न होंति ।
 तेथ मी विनती । ऐसी करीन ॥ ४ ॥
 ह्मणौनु तुमचा देवा । परिवार आघवा ।
 तेतुलीं रूपें होआवा । मीं चि एकु ॥ ५ ॥
 आणि देव्हाराचि आपुलीं । उपकरणें जेतुलीं ।
 माझि रूपें तेतुलीं । होआवीं जी ॥ ६ ॥
 ऐसा मागैन वर । तेथ हो ह्मणति श्रीगुरु ।
 मग तो परिवार । मीं चि होइन ॥ ७ ॥
 उपकरणजात सकलैक । तें हिं होईन एकैक ।
 मग उपास्तियें कवतिक । देखिजेल ॥ ८ ॥
 श्रीगुरु बहुतांची माए । परि एकलौती होउनि ठाए ।
 तैसें करुनु आण वाए । कृपे तिये ॥ ९ ॥
 तेया अनुरागा वेधु लावी । एकपत्नीव्रत घेववी ।
 क्षेत्रसन्यासु करवी । लोभा करवि ॥ १० ॥
 चतुर्दिक्षु वारा । न लहाये निगों बाहिरा ।
 तैसा गुरुकृपे पांजरा । आपण चि होईन ॥ ११ ॥
 आपुलेया गुणाचीं लेणीं । करीन गुरुसेवे स्वामिणी ।
 हें असो होईन गवसणी । गुरुभगतीसि ॥ १२ ॥
 गुरुस्नेहाची वृष्टि । मी पृथ्वी होईन तलवटीं ।
 ऐसिया मनोरथांचिया शृष्टी । रची अनंता ॥ १३ ॥
 ह्मणे श्रीगुरुचें भवन । मी आपण होईन ।
 आणि दासु होउनु करीन । दास्य तेथिचें ॥ १४ ॥

रिगतां निगतां दातारें । उल्लाङ्गिति उंबरें ।
 ते मी होईन आणि द्वारें । द्वारपाल ॥ १५ ॥
 मी पाउवा होइन । तेया मीं चि मेलवीन ।
 छत्री मी होईन । बारी मी चि ॥ १६ ॥
 मी तलु उपरु ह्मणता । चवरधरु हातुदेंता ।
 स्वामी पुढां बोलता । होईन मी ॥ १७ ॥
 हडपु मीं बोलमैन । उगालु मी चि घेईन ।
 उलिंग मी करीन । आंगोलिचें ॥ १८ ॥
 होईन गुरुचें आसन । अलंकार परिधान ।
 चंदनादि होईन । उपचार मीं ॥ १९ ॥
 मी चि होईन सुआरु । बोगरीन उपहारु ।
 आपणपें श्रीगुरु । बोवालिन ॥ ४२० ॥
 मग देऊ आरोगिति । तेधवां पांतिकरु पांती ।
 मीं चि होईन पुडुतीं । देईन वीडा ॥ २१ ॥
 मग मी ताट काढीन । सेज मी झाडीन ।
 चरणसेवा करीन । मी चि देखें ॥ २२ ॥
 सिंहासन होईन आपण । वरि श्रीगुरु करिति आरोहण ।
 करीन खरेपण । उल्लगेचें ॥ २३ ॥
 श्रीगुरुचें मन । जेया देईल अवधान ।
 तो मी पुढां होईन । चमत्कारु ॥ २४ ॥
 तेया श्रवणाचां आंगणीं । होईन शब्दाचिया क्षोणी ।
 स्पर्श होईन घसणी । आंगिचिये ॥ २५ ॥
 श्रीगुरुचे डोले । अवलोकन स्नेहालें ।
 पाहांती तियें सकलें । रूपें होइन ॥ २६ ॥
 तिये रसने जो रजु रुचेल । तो आपण चि होइजेल ।
 गंधरूपें कीजेल । घ्राणसेवा ॥ २७ ॥

एवं बाह्यमनोगत । गुरुसेवा समस्त ।
 वेंटाळनु वस्तुजात । होउनियां ॥ २८ ॥
 जवं देह असैल । तवं ऐसी सेवा कीजैल ।
 मग देहांति नवल । बुद्धि असे ॥ २९ ॥
 इये शरीरिची माती । मेलवीन तिये क्षिती ।
 जेथ श्रीचरण ठांति । श्रीगुरुचे ॥ ४३० ॥
 माझा स्वामी कवतिकें । स्पर्शैल जियें उदकें ।
 तेथ लया नीकें । नेईन आप ॥ ३१ ॥
 श्रीगुरु वोवालिजति । कां भवनीं जिये उजलिजति ।
 तेयां दीपाचेया दीप्ती । ठेवीन तेज ॥ ३२ ॥
 चवरिं हान वीजणा । तेथ लयो करीन प्राणा ।
 मग आंगाचा वीजणा । करीन तेथ ॥ ३३ ॥
 जिये जिये अवकाशीं । श्रीगुरु असति परिवारेंसिं ।
 आकाश लयाकाशीं । नेईन तिये ॥ ३४ ॥
 परि जींतु मेळा न संडीं । निमिषु वायां न धडीं ।
 ऐसेन गणाविया कोडीं । कल्पांचिया ॥ ३५ ॥
 एतुले वेन्हीं धिवंसा । जेयाचेया मानसा ।
 आणि करूनि हीं तैसा । अपारु चि ॥ ३६ ॥
 राति दियो नेणे । थोडें बहू न ह्मणे ।
 ह्मणियांचेनि दासपणें । साजा होए ॥ ३७ ॥
 तो व्यापारु एणें नावें । गगना होउनु थोरावे ।
 एकला करी आघवें । एकी चि कालि ॥ ३८ ॥
 हृदयवृत्ती पुढां । आंग चि घे दवडा ।
 काज करी होडा । मानसेंसीं ॥ ३९ ॥
 एकाधेया वेला । श्रीगुरुचेया खेला ।
 लोण करी सकला । जीविताचें ॥ ४४० ॥

गुरुदास्यें कृशु । जो गुरुप्रेमें सपोसु ।
 गुरुआज्ञे आवासु । आपण जो ॥ ४१ ॥
 जो गुरुकुलें सकुलीनु । जो गुरुबंधुसौजन्यें सौजनु ।
 जो गुरुदास्यें सज्यसनु । निरंतर ॥ ४२ ॥
 गुरुसंप्रदायधर्म । ते जेया वर्णाश्रम ।
 गुरुचर्चा नित्यकर्म । जेयासि गा ॥ ४३ ॥
 गुरु क्षेत्र गुरु देवता । गुरु माये गुरु पिता ।
 जो गुरु परौता । मार्गु नेणे ॥ ४४ ॥
 श्रीगुरुचें द्वार । तें जेया सर्वस्व सार ।
 गुरुसेवकां सहोदर । प्रेमें भजे ॥ ४५ ॥
 जेयाचें वक्त्र । वाहे गुरुनामाचे मंत्र ।
 गुरुवचना वांचूनि शास्त्र । हाति न शिवे ॥ ४६ ॥
 सीतले गुरुचरणीं । भलेतें जें पाणीं ।
 तेया तीर्थे यात्रे आणीं । त्रैलोकिचीं ॥ ४७ ॥
 श्रीगुरुचें उसिटें । लाहे जें अवचटें ।
 तें तेणें लाभें वीटे । समाधीसि ॥ ४८ ॥
 कैवल्यसुखा साठि । परमाणु घे किरीटी ।
 उधळति पायां पाठि । चालतां जे ॥ ४९ ॥
 हें असो सांगों केती । नाहिं पार गुरुभक्ती ।
 तन्हीं गा क्रांतमती । कारण हें ॥ ४५० ॥
 जेयां इये भक्ती चाड । जेयां इये चि विखिचें कोड ।
 जो सेवे वांचूनु गोड । न मनी काहिं ॥ ५१ ॥
 तो तत्वज्ञानासि ठाऊ । ज्ञाना तेणें चि आवो ।
 हें असो तो देऊ । ज्ञानभक्तु ॥ ५२ ॥
 हें जाण पां साचोकारें । तेथ ज्ञान उघडेनि द्वारें ।
 नांदतसे जगा पुरे । या रीती ॥ ५३ ॥

जिये गुरुसेवा विषीं । माझा जीउ अभिलाखी ।
 हणौनि सोये चूकी । बोली केली ॥ ५४ ॥
 एन्हविं असतां हातिं खुला । भजनअवधानीं आंधला ।
 आणि चर्ये लागि पांगुला । पासौनि मंदु ॥ ५५ ॥
 गुरुवर्णनिं मूका । आलसी पोसिजे फूका ।
 परि आथि नीका । सानुरागु ॥ ५६ ॥
 तेणें चि कारणें । हें स्थूल पोखणें ।
 पडिलें मज हणें । ज्ञानदेउ ॥ ५७ ॥
 तरि तो बोलु उपसाहावा । बोलगे अवसर देयावा ।
 आतां हणैन बरवा । ग्रंथार्थु चि ॥ ५८ ॥
 तरि परियसां श्रीकृष्णु । जो भूतभारसहिष्णु ।
 तो बोलतसे वितृष्णु । पार्थु आइके ॥ ५९ ॥
 हणें शुचित्व गा ऐसें । जेया पासिं दीसे ।
 आंग मन जैसें । कापुराचें ॥ ६० ॥
 कां रत्नाचें दलवाडें । तैसें सबाह्य चोखडें ।
 आंतु बाहिरि एंके पाडें । सूर्यु जैसा ॥ ६१ ॥
 बाहिरि कमें क्षालला । भीतरि ज्ञानें उजलला ।
 इहिं दोहिं परि आला । शुचित्वासि ॥ ६२ ॥
 मातिया आणि जलें । बाह्य एणें मेलें ।
 निर्मलां होइजे बलें । वेदांचेनि ॥ ६३ ॥
 भले तेथ बुद्धि बली । पै रज आरिसा उजली ।
 सौंदणि फेडी थिगलीं । वस्त्राचिं गा ॥ ६४ ॥
 किंबहुना इया परीं । बाह्य चोख अवधारीं ।
 ज्ञानदीपु अंतरीं । हणौनि शुद्ध ॥ ६५ ॥
 यन्हविं तन्हीं पांडुसुता । आंतु शुद्ध नव्हतां ।
 बाह्य कर्म तत्वता । विटंबु गा ॥ ६६ ॥

मृत्यु जैसा श्रिगारिला । गर्दभु तीर्थ न्हाणिला ।
 कङ्क दूधिया माखिला । गुळें जैसा ॥ ६७ ॥
 वोसिं तोरण बांधलें । उपवासियें अन्नें माखिलें ।
 कुंकुसेंदुर केलें । कांतहीनें ॥ ६८ ॥
 कलस ढिवांचे पोकल । जलो वरिचील झलाल ।
 काइ करिसी चित्रफल । आंतु सेण ॥ ६९ ॥
 तैसें कर्म वरिचिली कडां । न सरे थोर मोला कूडा ।
 नव्हे मशिरेचा घडा । पवितृ गंगा ॥ ७० ॥
 ह्मणौनि अंतरिं ज्ञान होआवें । मग बाह्य लाभैल स्वभावें ।
 वारि ज्ञान कर्म संभवें । ऐसें कैं जोडे ॥ ७१ ॥
 या लागि बाह्यविभागु । कर्म धूतला चांगु ।
 ज्ञानें फेडिला वंगु । अंतरिचा ॥ ७२ ॥
 तेथ अंतरबाह्य गेलें । निर्मलत्व एक जालें ।
 किंबहुना निर्वाळलें । शुचित्व चि ॥ ७३ ॥
 ह्मणौनि सद्भाव जीवगत । बाहिरि दीसताति फांकत ।
 स्फटिकगृहिचे डोलत । दीप जैसे ॥ ७४ ॥
 विकल्पु जेणें जेणें उपजे । नाथिली विकृति निफजे ।
 अन्यायवृत्तिचीं बीजें । अंकुर घेंति ॥ ७५ ॥
 तें आयिके अथवा भेटे । पारि मनीं काहिं नुमटे ।
 मेघरंगें न घटे । व्योम जैसें ॥ ७६ ॥
 यन्हविं इंद्रियांचेनि मेलें । विषयां वरि लोले ।
 पारि विकाराचेनि विटालें । सिंपिजे ना ॥ ७७ ॥
 भेटलिया नारी । चोखी अथवा माहारी ।
 तेथ नातळती परी । राहाटों जाणे ॥ ७८ ॥
 कां पति-पुत्रातें आळंगी । एके चित्तें तन्वंगी ।
 तेथ पुत्रभावाचां आंगीं । न लगे चि कामु ॥ ७९ ॥

तैसें हृदय चोख । संकल्पविकल्पीं सनोलख ।
 कृत्याकृत्य विशेष । फुडें जेया ॥ ४८० ॥
 पाणियें ही रान भीजे । आधणिं हरलु न सिजे ।
 तैसी विकल्पजातीं न सिंपिजे । मनोवृत्ती ॥ ८१ ॥
 तेया नावं शुचिपण । पार्था गा संपूर्ण ।
 हें देखसी तेथ जाण । ज्ञान असे ॥ ८२ ॥
 आणि स्थिरता साचे । घर रिगाली जेयाचें ।
 तो पुरुष ज्ञानाचें । आयुष्य गा ॥ ८३ ॥
 देह तारि वरिचिली कडे । आपुलेया पारि हींडे ।
 पारि बैसिक न मोडे । मानसाची ॥ ८४ ॥
 वत्सा वरौनि धेनुचें । खेह राना न वचे ।
 न येति भोगुं सतियांचें । प्रेमभोग ॥ ८५ ॥
 कां लेभिया दूरि जाये । पारि जीउ ठेवां चि आहे ।
 तैसा देह चालितां नोहे । चलु चित्ता ॥ ८६ ॥
 धावंतेया अभ्रा सर्वे । आकाश जैसें न धवे ।
 भ्रमण—चक्रीं न भंवे । जैसा ध्रुवु ॥ ८७ ॥
 पथिकांचिया एरिझारा । सर्वे एणेंजाणें धनुर्द्धरा ।
 नाहिं जेवि तरवरां । पथीचियां ॥ ८८ ॥
 तैसा चलनघलनात्मकिं । असौनि इये पंचभौतिकिं ।
 भूतउर्मी एकी । चालिजे ना ॥ ८९ ॥
 वांहुंटलिचेनि बलें । पृथ्वी जैसी न ढले ।
 तैसा उपद्रवधुमालें । न लोटे जो ॥ ९० ॥
 दैन्यदुःखें न तपे । भयशोकें न कंपे ।
 देहमृत्यू न वासिपे । पातलेयां ॥ ९१ ॥
 आर्तिआशपडिभरें । विविधव्याधिगजरें ।
 उजू असतां पाठिमोरें । नव्हे चित्त ॥ ९२ ॥

निंदा निस्तेज दंडी । कामलोभ वरिपडी ।
 लोभ नव्हे वांकुडी । मानसाची ॥ ९३ ॥
 आकाश हें ओसरो । पृथिवी वर वीरो ।
 परि नेणे मोहरो । चित्तवृत्ती ॥ ९४ ॥
 हाथि हाळा फुलें । पासिवणें जेवि न घली ।
 तैसा नोहोटे दुर्वाक्यसेलीं । सेलिला सांता ॥ ९५ ॥
 क्षीरार्णवाचां कळोलें । नाहिं कंपु मंदराचलें ।
 आकाश न जले जालें । वणवेयाचां ॥ ९६ ॥
 तैसा आला गेला उर्मी । नाहिं गजबज मनोधर्मि ।
 किंबहुना धीर क्षमिं । कल्पांति हिं ॥ ९७ ॥
 पै स्थैर्य ऐसी भाष । बोलिजे सविशेष ।
 ते हे दशा देख । देखणेयां ॥ ९८ ॥
 हें स्थैर्य निजगडें । जेथ आंगें जीवें जोडे ।
 तो ज्ञानाचें उघडें । निधान जाण ॥ ९९ ॥
 आणि इसाळु जैसा घरा । कां दंदिया हातियरा ।
 न विसंबे भांडारा । बद्धकु गा ॥ ५०० ॥
 एकलौतेया बालका । वरिपडौनि असे अंबिका ।
 कां मधुविषिं मधुमक्षिका । लोभिणि जैसी ॥ १ ॥
 अर्जुना तिया परि । अंतष्करणा जतन करिं ।
 नेदि उभें ठाकों द्वारीं । इंद्रियाचां ॥ २ ॥
 ह्मणे कामु हा आइकैल । हे आशसेयाचि देखैल ।
 तरि जीवा कडे ढूंकैल । ह्मणुनि भेदु ॥ ३ ॥
 बाहिरि धिटे जैसी । दाटुगा पति कलासी ।
 करी टेहणी तैसी । प्रवृत्तीसि ॥ ४ ॥
 ससेचेनि वाणिपणें । देहा सकट आठणें ।
 संयमा वरि करणें । बुजुनु घाली ॥ ५ ॥

मनाचा महाद्वारि । प्रत्याहाराचे ठाणांतरि ।
 यमदम शरीरी । जागवी उभे ॥ ६ ॥
 आधारि नाभिकठि । बंधनयाची घरटी ।
 चंद्रसूर्यसंपुटी । सुये चित्त ॥ ७ ॥
 समाधिचिये सेजेपासि । बांधौनि घाली ध्यानेसि ।
 समरसि करणासि । अंतरातें ॥ ८ ॥
 आगा अंतःकरणनिग्रहो जो । तो हा पै जाणिजो ।
 हा आधि तेथ उदोजो । ज्ञानाचा पै ॥ ९ ॥
 जेयाची आज्ञा आपण । सिरि वाहे अंतःकरण ।
 मनुष्याकारें जाण । ज्ञान चि तो ॥ ५१० ॥

इंद्रियार्थेषु वैराग्यमनहंकार एव च ।

जन्ममृत्युजराव्याधिदुःखदोषानुदर्शनं ॥ ८ ॥

आधि विषयविशि । वैराग्याची नीकी ।
 पुरवणी मानसिकि । जेयातें आधि ॥ ११ ॥
 वमिलेया अन्ना । लाल न घोंटी रसना ।
 आंग न सुवे आंलिंगना । प्रेताचिया ॥ १२ ॥
 विष खाणें नांगवे । जलतां घरिं न रिगवे ।
 व्याघ्रविवरा न वचवे । वस्ती जेवि ॥ १३ ॥
 धडाडिते लोहरसि । उडी न घलवे जैसी ।
 न करवे उसिसी । अजगराची ॥ १४ ॥
 अर्जुना तेणें पाडें । विषया वार्त्ता नावडे ।
 नेंदी इंद्रियांचेनि तोंडें । काहिं चि जाउ ॥ १५ ॥
 जेयाचां मनिं आलस्य । देहिं अतिकारिष्य ।
 यमदमोंसिं समरस्य । जेयासि ॥ १६ ॥
 तपोव्रतांचा मेळावा । जेयाचां ठाई पांडवा ।
 युगांतु जेया गावां । आंतु एतां ॥ १७ ॥

बहु योगाभ्यासिं हाव । राना कडे धाव ।
 न साहे जो नाव । सांघाताचें ॥ १८ ॥
 नाराजाचि आंधुरणें । पूयपंक्ति लोलणें ।
 तैसी लेखी भोगणें । इहिकिचें ॥ १९ ॥
 स्वर्गातें मानसें । आइकौनि मानी ऐसें ।
 कुहिलें पिशित जैसें । श्वानाचें ॥ ५२० ॥
 हें तें त्रिषयवैराग्य । जें आत्मलाभाचें भाग्य ।
 येणें ब्रह्मानंदा योग्य । होति जीव ॥ २१ ॥
 ऐसा उभयभोगुत्रासु । देखसी जेथ बहुवसु ।
 तेथ जाण राहिवांसु । ज्ञानाचा असे ॥ २२ ॥
 आणि सचाडाचिया परी । इष्टापूर्त करी ।
 परि केलेपण शरीरी । उरों नेंदी ॥ २३ ॥
 वर्णाश्रमपोषकें । कर्म नित्यनैमित्तिकें ।
 तेयां माझि काहिं न ठके । आचरतां ॥ २४ ॥
 परि हें मियां केलें । कां हें माझेनि जालें ।
 ऐसें नाहिं ठेविलें । वासने माझि ॥ २५ ॥
 जैसें अवचितेपणें । वायूसि विचरणें ।
 निराभिमानीं उदैजणें । सूर्याचें ॥ २६ ॥
 कां श्रुति सदा बोले । गंगा काजें विण चाले ।
 तैसें अवष्टंभहीन भलें । वर्त्तन जेयाचें ॥ २७ ॥
 रुतुकाळि तारि फलति । परि फललों हें नेणति ।
 तेया वृक्षांचिया ऐसी वृत्ती । कर्मि सदा ॥ २८ ॥
 एवं मनिं कर्में बोलिलि । जेथ अहंकारा उखी जाली ।
 एकावलिएची वाढिली । दोरी जैसी ॥ २९ ॥
 संबधें विण आकाशी । अभ्रें असति आपैसि ।
 देहिं कर्में तैसीं । जेयासि गा ॥ ५३० ॥

मद्यपा आंगिचें वस्त्र । कां लेपा हातिचें शस्त्र ।
 नातारि बैला वारि शास्त्र । बांधलें असे ॥ ३१ ॥
 तेणें पाडें देहीं । आहें हे से चि नाहिं ।
 निरहंकारता पाहिं । तेया नावं ॥ ३२ ॥
 हें संपूर्ण जेथ दीसे । तेथ गा ज्ञान असे ।
 इये बिखि अनारिसें । बोलों न ये ॥ ३३ ॥
 आणि जन्म मृत्यु दुःखें । व्याधि वार्धक्य कलुषें ।
 में आंगा न यंतां देखे । दुरौनि जो ॥ ३४ ॥
 साधकु विवंसिया । कां उपसर्गे योगिया ।
 पावे उणेया पुरेयां । बोधंवा जेवि ॥ ३५ ॥
 वैर जन्मांतरिचें । सापा मनौनि न वचे ।
 तेवि अतीतां जन्मांचें । उणें वाहे ॥ ३६ ॥
 डोलां हरलु न धरे । घाई शास्त्र न जरे ।
 तैसें कालिचें न विसरे । जन्मदुःख ॥ ३७ ॥
 झणे पूयगर्ते रिगालां । मूत्ररंध्रांनि निगालां ।
 कटारे मियां चाटिला । कुचस्वेदु ॥ ३८ ॥
 ऐसिया ऐसिया परीं । जन्माचा कांटाला धरी ।
 आतां तें करीं । जेणें नोहे ॥ ३९ ॥
 हारि उमचावेया । जुंवारु ये डाय़ा ।
 कां वैरा बापिकेया । पुतृ जचे ॥ ५४० ॥
 मारिलेयाचेनि रागें । पाठिचा सूड मागे ।
 तेणें आक्षेपें लागे । जन्मा पाठिं ॥ ४१ ॥
 परि जन्मांति जे लाज । न संडी तेयाचें निज ।
 संभाविता निस्तेज । न साहे जैसें ॥ ४२ ॥
 आणि मृत्यु पुढां आहे । तो चि कल्पांति कां पाहै ।
 परि आजिचि होये । साबधुं जो ॥ ४३ ॥

माक्षि अधाउं झणतां । धडिये चि पांडुसुता ।
 पन्हणारु आइता । काशि जेवि ॥ ४४ ॥
 कां न पवतां रणाचा ठाऊ । सांभालिजे जैसा बाबो ।
 वोढण सुयिजे जैसा घाबो । न लगतां चि ॥ ४५ ॥
 पाहेचा पेणा वाटबंधां । तवं आजि चि होइजे सावधां ।
 जीउ न निगतां ओखदा । धांविजे जेवि ॥ ४६ ॥
 यन्हवि ऐसें केवि घडे । जो जलतां घरि सांपडे ।
 तो न पवाडे । कुहां खणों ॥ ४७ ॥
 चोंढिये पाथरु गेला । तैसेनि जो बुडाला ।
 तो बोंबे सकट मूकला । कोण सांघे ॥ ४८ ॥
 झणुनु समर्थेंसि वैर । जेया पडे हाडकाइर ।
 तो जैसा आठे पाहार । परजुनु चि असे ॥ ४९ ॥
 नातरि केलवली नोवरी । संन्यासी कां जेया परिं ।
 तैसी न मरतां करी । मृत्युसूचना ॥ ५० ॥
 पै गा जो इया परिं । जन्में चि जन्म निवारी ।
 मरणें चि मृत्यु मारी । आपण उरे ॥ ५१ ॥
 तेयातें घरि ज्ञानाचें । सांकडें नाहि साचें ।
 जेया जन्ममृत्युचें । ह्दइं शल्य ॥ ५२ ॥
 आणि तेया चि परीं जरा । न टेंकतां शरीरा ।
 तारुण्याचिया भरा । माक्षि देखे ॥ ५३ ॥
 झणे आजिचां अवसारिं । पुष्टि जे हे शरीरिं ।
 ते पाहे होईल काचरी । सिजली जैसी ॥ ५४ ॥
 निदैवांचे व्यवसाये । तैसे ठाकति हातपाए ।
 अमंत्रिया राज्याची परि होये । बलासिया ॥ ५५ ॥
 फुलाचेया भोगा । लागि प्रेम दांगा ।
 तें कन्हेयाचा गुडगा । कैसें होइल ॥ ५६ ॥

बौढालाचां खुरिं । आखरु आते बुरी ।
 तैसी दशा माथें श्रवण वरि । सव लेहें ॥ ५७ ॥
 पद्मदलेसिं इसालें । भांडताति हे डोले ।
 ते होतील पडवले । पीकलीं तैसीं ॥ ५८ ॥
 भबैचि पडले । बोमथती सिनसालें ।
 उरु कुहिल जलें । आंसुवांचेनि ॥ ५९ ॥
 जैसे बाबुलेचें खोड । गिरबडूनि जाति सरड ।
 तैसे पिचडिं तोंड । सरांडेल ॥ ६० ॥
 रांधवण बोलि पुढें । पन्हिवे वाहाति खाताडें ।
 तैसिं होति नाकाडें । बिडिबिडितील ॥ ६१ ॥
 तांबोलें वोंठ राउं । हांसतां दांत दाउं ।
 सनागर मिरउं । बोली जेणें ॥ ६२ ॥
 तेयाचिया तोंडा । येर जलंबाचा लोंढा ।
 हरडी उमलैल दाढा । दांतेंसि जाण ॥ ६३ ॥
 कुलवाडि जैसी खेटली । कां वाकडिया ढोरें बैठलि ।
 तैसी नूठील काहिं केली । जीम हें ॥ ६४ ॥
 कुसलें कोराडिं । वारेनि जांति बरडी ।
 तैसी आपत्य तोडी । दाढियेसि ॥ ६५ ॥
 आशाढिचेनि जलें । जैसिं क्षिरपांति मौलें ।
 तैसे खांडेहूनि लाले । पेटति पुर ॥ ६६ ॥
 वाचेसि अपवाडु । कानासि अनुघाडु ।
 पिडु गरुवा मांकडु । होईल हा ॥ ६७ ॥
 तणाचें बुजवणें । आंदोले वारे गुणें ।
 तैसे येईल कांपणें । सर्वांगासि ॥ ६८ ॥
 पायां पडति वेंगडीं । हात होंति मुरुकुंडी ।
 करवेपण बागडीं । नाचनीळ हे ॥ ६९ ॥

मलमूत्रद्वारे । होउनि ठांति खोंकरें ।
 नवसियें सूंति येरें । माझां निधनि ॥ ५७० ॥
 देखौनि थूकील जगु । मरणाचा पडेल पांगु ।
 सोइरियां उभगु । होईल माझा ॥ ७१ ॥
 स्त्रिया क्षणति विवंसी । बालें जाति मुसि ।
 किंबहुना चिलसी । पात्र होइन ॥ ७२ ॥
 उभलिचा उजगरा । सेजियां साइलेयां घरा ।
 सिणवी झांतारा । बहुतांतें हा ॥ ७३ ॥
 ऐसी वृद्धाप्याची खोंचणी । आपणेया तरुणपणि ।
 देखों देखों आणि । मग जो वीटे ॥ ७४ ॥
 क्षणे पाहे हें होइल । आतांचि भोगितां जाइल ।
 मग काइ उरैल । हितालागि ॥ ७५ ॥
 क्षणुनि नाइकर्णे पावे । तव आइकौनि घाली आघवें ।
 पंगु नव्हतां जावें । नीकेया स्थाना ७६ ॥
 दीठि जवं जाये । तव पाहावें तेतुलें पाहे ।
 मूकत्वा आधि धाये । सुभाषिति ॥ ७७ ॥
 हात होतील खुलें । हें पुढेल मोटकें कले ।
 तव करुनि घाली सकलें । दयादिकें ॥ ७८ ॥
 मन होइल वेडें । ऐसिये दशे पुढें ।
 चितौनि ठेवी चोखडें । अदृष्ट जो ॥ ७९ ॥
 जैसैं चोर पाहे झोंबती । तव आजी चि रुसिजे संपत्ती ।
 झांकाझांकि कीजे वाति । न वचतांचि ॥ ५८० ॥
 तैसैं वृद्धार्थें थावें । मग जें वायां जावें ।
 तें आपणेयां आघवें । सोवतें करी ॥ ८१ ॥
 आतां मोडुनु बसविलि दुर्गे । कां वलित धरिलें खंगें ।
 तेथ डफकेन जो रिगे । तो नांगवला ॥ ८२ ॥

तैसें वृद्धाप्य होये । आलेपणें वायां जाये ।
 जें तो शतवृद्ध आहे । नेणों कैचा ॥ ८१ ॥
 झाडिलि कोलें झाडी । तेया न फले चि जेवि बोंडि ।
 जाला आगि तरि राखौंडी । जालील काइ ॥ ८४ ॥
 ह्यणुनि वृद्धाप्याचेनि आटवें । वृद्धाप्यें जो न नगवे ।
 तेयाचां ठाई जाणावें । ज्ञान आहे ॥ ८५ ॥
 तैसेचि नाना रोग । पडिघांति पुढां आंग ।
 तव आरोग्यतेचे उपेग । करुनि घाली ॥ ८६ ॥
 सांपाचां तोंडि । जे पडिलें सकूडी ।
 ते लाउनियां सांडी । बुद्धिवंत ॥ ८७ ॥
 तैसा वियोगु जेणें दुःखें । विपत्ति शोकु पोखे ।
 तें स्नेह सांडौनि सुखें । उदासु जो होए ॥ ८८ ॥
 आणि जेणें जेणें कडें । दोष सुंतील तोंडें ।
 तिये कर्मरंध्रों गुंडे । नियमाचे दाटी ॥ ८९ ॥
 ऐसीऐसीया आइती । जेयाची परि असती ।
 तो ज्ञानसंपत्ती । गोसांवि गा ॥ ५९० ॥

असक्तिरनभिष्वंगःपुत्रदारगृहादिषु ।

नित्यं च समचित्तत्वमिष्टानिष्टोपपत्तिषु ॥ ९ ॥

आतां आणिक ही एक । लक्षण अलौलिक ।
 सांघैन आइक । धनंजया ॥ ९१ ॥
 तरि गृहपरिग्रहावरि । उदासु इया परि ।
 उखिता जैसा बिढारी । बैसविला असे ॥ ९२ ॥
 कां झाडांची साउली । वाटे जातां मिनली ।
 घरावरि तेतुली । आस्था जेया ॥ ९३ ॥
 साउली सरिसी चि असे । परि असो हें नेणिजे जैसैं ।
 छियेचें तैसें । आगतें जेया ॥ ९४ ॥

आणि प्रजा जे जाली । ते वसती चि कीर आली ।
 कां गोरुवें बैसली । रुखातलि ॥ ९५ ॥
 जो संपती माजि असतां । ऐसा गमे पांडुसुता ।
 जैसा कां वाटे जाता । साक्षी ठेविला ॥ ९६ ॥
 किंबहुना पूसा । पांजरेया माझि जैसा ।
 वेदाज्ञेसि तैसा । भीउनु असे ॥ ९७ ॥
 यन्हर्वि दारां गृहपुत्रीं । नाहिं जेयाची मैत्री ।
 तो जाण धात्री । ज्ञानाची गा ॥ ९८ ॥
 आणि माहासिंधु जैसा । ग्रीष्मवर्षा सरिसा ।
 इष्टानिष्टां तैसां । जेयाचां ठांड ॥ ९९ ॥
 कां तीन्ही काळ होतां । त्रिधा न्हवे चि सविता ।
 तैसा सुखदुःखि चित्ता । भेदु नाहिं ॥ ६०० ॥
 जेथ नभाचेनि पाडे । समत्वा उणें न पडे ।
 तेथ गा ज्ञान जोडे । जातखेउं ॥ १ ॥

मयि चानन्ययोगेन भक्तिरव्यभिचारिणी ।

विविक्तदेशसेवित्वमरतिर्जनसंसदि ॥ १० ॥

आणि मी वांचुनु काहिं । गोमटें जेया नाहिं ।
 ऐसा समो तिहिं । निश्चयाचा केला ॥ २ ॥
 शरीर वाचा मानस । पियालीं कृतनिश्चयाचे कोश ।
 एक मी वांचूनि वास । न पाहवेया ॥ ३ ॥
 किंबहुना निज । जेयाचें जालें मज ।
 जेणें आपणेयां आह्मां सेज । येकि केलि ॥ ४ ॥
 रिगतां वल्लभापुढें । नाहिं जीविं सांकडे ।
 तिगे कांतेचेनि पाडे । एकसरे जो ॥ ५ ॥
 मित्रौनि मित्रुत चि रासे । सद्भिं गंगापय जैसें ।
 मी होउनि मातें तैसें । सर्वस्व दे ॥ ६ ॥

सूर्याचां होणां होइजे । सूर्यासवें जाइजे ।
 हें दिकळेण साजे । प्रभे जेवि ॥ ७ ॥
 पै पणियांचिमे भूमिके । पाणी चि तळपे कवतिकें ।
 ते लहरी क्षणति लोकिकें । यन्हवि पाणी चि तें ॥ ८ ॥
 जो अनन्यु तियापरी । मो जालां हिं मातें वरी ।
 तो ते मूर्ति धरी । ज्ञानाची येथ ॥ ९ ॥
 आणि तीर्थे तटें । तरोवनें चोखटें ।
 आवडति कपाटें । वसों जिया ॥ १० ॥
 शैलकक्षाचीं कंदरे । जलाशय परिकरे ।
 अधिष्ठी जो आदरे । नगरा न ए ॥ ११ ॥
 बहू ऐकांतावरि प्रीति । जेया जनपदाची खंती ।
 जाण मानुषी मूर्ति । ज्ञान चि तो ॥ १२ ॥
 आणिक ही पुढुती । चिन्ह गा सुमती ।
 ज्ञानाचिये निरुती । लागी सांगों ॥ १३ ॥

अध्यात्मज्ञाननित्यत्वं तत्त्वज्ञानार्थदर्शनं ।

एतज्ज्ञानमिति प्रोक्तमज्ञानं यदतोऽन्यथा ॥ ११ ॥

तरि परमात्मा ऐसें । जें एके वस्तु असे ।
 तें जेया असे । ज्ञानातव ॥ १४ ॥
 तें एक वांचूनि आनें । जियें भवस्वर्गादि ज्ञानें ।
 तें अज्ञान ऐसें मनें । निश्चयो करी ॥ १५ ॥
 स्वर्गु जीणावा हें सांडी । भवविषि काम अडी ।
 दे अध्यात्मज्ञानि बुडी । सद्भावेंसि ॥ १६ ॥
 मंगलिये घाटे । शोधूनियां अव्हाटे ।
 निगिजे जेवि नीटें । राजपथें ॥ १७ ॥
 तैसें अज्ञानजात करी । पण आववेंचि एकीकडे सारी ।
 मग मन बुद्धि मोहरी । अध्यात्मज्ञानि ॥ १८ ॥

ह्मणे हें चि एक आधि । एर जाणणें ते भ्रांति ।
 ऐसा निष्कर्षी मति । मेरु होये ॥ १९ ॥
 येवं निश्चयो जेयाचा । द्वारिं अध्यात्मज्ञानाचा ।
 ध्रुवो देवो गगनिचा । तैसा राहला ॥ ६२० ॥
 तेयाचा ठांडं ज्ञान । या बोला ह्मणसी व्यवधान ।
 जें ज्ञानि बैसलें मन । तेव्हां चि तो तें ॥ २१ ॥
 तरि बैसलेपणें जें होये । तें बैसतां चि वेलिं नोहे ।
 तन्हीं ज्ञाना तेया आहे । सरिसा पाडु ॥ २२ ॥
 आणि तत्वज्ञान निर्मल । विये जें एक फल ।
 ते ज्ञेय हिं वरि सरल । दीठि जेयाची ॥ २३ ॥
 यन्हुविं बोधा आलेनि ज्ञानें । जरि ज्ञेय न दिसे चि मनें ।
 तरि ज्ञानलाभु ही न मने । जाला सांता ॥ २४ ॥
 आंधलेनि हातिं दिवा । घेउनि काये करावा ।
 तैसा ज्ञाननिश्चयो आघवा । वायां जाए ॥ २५ ॥
 परि ज्ञानाचेनि प्रकाशें । परतविं दीठि जें बैसे ।
 ते स्फूर्ति असे । अंध होउनि ॥ २६ ॥
 ह्मणुनि ज्ञान जेतुलें दावी । तेतुली वस्तु अघवी ।
 देखे ऐसी होआवी । बुद्धि चोख ॥ २७ ॥
 या लागि ज्ञानें निर्दोषें । दाविलें ज्ञेय देखे ।
 तैसेनि उन्मेखें । आधिला जो ॥ २८ ॥
 जेवढी ज्ञानाची उधि । तेव्हाडी चि तेयाची बुद्धि ।
 तो ज्ञान हे शाद्धि । करणें न लगे ॥ २९ ॥
 पै ज्ञानाचिये प्रभे सवें । जेयाची मति पावे ।
 हातधराणियां सीवे । परतत्वातें ॥ ६३० ॥
 तो चि ज्ञान हे बोलतां । विस्मो कोणु पांडु सुता ।
 कां सबित्तियातें सविता । ह्मणावें असें ॥ ३१ ॥

तव श्रोतां क्षणितलें असो । न संघें देवाचा अतिसो ।
 ग्रंथउत्कंठे आडसो । घालिसी कां ॥ ३२ ॥
 तूझा हा चि आझां थोर । वगतृत्वाचा उपकार ।
 जे ज्ञानविषो फार । उपदेशिला ॥ ३३ ॥
 रसु न व्हावा अतिमात्रु । हा घेतासि केवि मंत्रु ।
 तरि अवंतुनु शत्रु । करितासि गा ॥ ३४ ॥
 ठांडं बैसतिये वेले । जे रससोये घेउनि पले ।
 तियेचा येरु वोडौ मिले । कोणा अर्था ॥ ३५ ॥
 आघवा चि विषिं भादि । पारि सांजवणी टेंको नेंदी ।
 ते खुरथोडी नसुधी । पोसी कवण ॥ ३६ ॥
 तैसी ज्ञानिं मति न फांके । येरें जल्पति नेणों केतुके ।
 परि तें असो नीके । केलें तुवां ॥ ३७ ॥
 जेया ज्ञानलेसादोसें । कीजति योगातिसायासें ।
 तें धणिचें आणि तूझेया ऐसें । केलें निरोपण ॥ ३८ ॥
 अमृताची सातवाकडी । लागो कां अनुघाडी ।
 सुखाचे दीस कोडी । गणिजतु कां ॥ ३९ ॥
 पूर्णचंद्रेंसिं राति । युग एक असौनि पांति ।
 तरि काय पाहाताति । चकोर ते ॥ ४० ॥
 तैसें ज्ञानाचें बालणें । आणि येणें रसालपणें ।
 आतां पुरे कोण क्षणे । आकर्णितां ॥ ४१ ॥
 आणि सभाग्यु पाहुणा ये । सुभगाची वाढती होये ।
 तें सरो न ये रससोए । ऐसें आधि ॥ ४२ ॥
 तैसा घडला प्रसंगु । ज्ञानिं आझां लागु ।
 आणि तुज ही अनुरागु । आधि येथ ॥ ४३ ॥
 क्षणौनि यया वाखाणा । पाठि सेइली चौगुणा ।
 नो क्षणों न येसि देखणा । होसि क्षानी ॥ ४४ ॥

तरि आतां या वारि । प्रज्ञेचा माजु धरिं ।
 पद साहसि करी । निरोपण ॥ ४५ ॥
 या संतवाक्या सरिसें । जी ह्मणितलें निवृत्तिदासैं ।
 माझें हीं जी ऐसें । मनोगत ॥ ४६ ॥
 या वारि आतां तुझीं । आज्ञापिलां स्वामी ।
 तारि वायां चि वाग्मी । वाढों नेंदी ॥ ४७ ॥
 एवं ये अवधारा । ज्ञानलक्षणे अटरा ।
 श्रीकृष्णें धनुर्द्वरा । निरोपिलि ॥ ४८ ॥
 मग ह्मणे या नावें । ज्ञान येथ जाणावें ।
 हें स्वमतें आघवे । ज्ञानिये ह्मणति ॥ ४९ ॥
 करतळा वारि वाटुला । डोलत देखिजे जेवि आवळा ।
 तैसें ज्ञानें डोलां । आर्क्षिं दाविजें तुज ॥ ६५० ॥
 आतां जें महामती । अज्ञान ऐसी वदंती ।
 ते ही सांघों व्यक्ती । लक्षणीं गा ॥ ५१ ॥
 यन्हाविं ज्ञान फुडें जालेयां । अज्ञान जाणवें धनंजया ।
 जें ज्ञान नव्हे तें आपैसेया । अज्ञान चि ॥ ५२ ॥
 पाहे पां देऊ आववा चि भरे । मग रात्री चि बोवि उरे ।
 वांचूनु काहिं तिसरें । नाहिं जेवि ॥ ५३ ॥
 तैसें ज्ञान जेथ नाहिं । तें चि अज्ञान पाहिं ।
 तरि सांघों काहिं काहिं । चिन्हें तियें ॥ ५४ ॥
 तरि संभावने जिये । जो मानाची वाट पाहे ।
 सत्कारें होये । तोष्टु जेया ॥ ५५ ॥
 गर्वें पर्वताचि सिखरें । तैसा महत्वा बरौनि नुतरे ।
 तेयाचां ठांड पुरें । अज्ञान असे ॥ ५६ ॥
 आणि स्वधर्माची मागवेलि । बांधे वाचेचा पिंपळि ।
 उभिला जैसा देउळि । जाणौनि कुंषा ॥ ५७ ॥

घाली विद्येचा पसारा । सुये सुकृताचा डांगोरा ।
 करी तेतुलें मोहरा । स्फीतीचेया ॥ ५८ ॥
 आंग वरि चर्ची । जनांतें वंची ।
 तो जाण अज्ञानाची । खाणी येथ ॥ ५९ ॥
 आणि वन्हि वनिं विचरे । तेथ जलति जैसिं स्थावरें ।
 तैसें जेयाचेनि आचरें । जगा दुःख ॥ ६० ॥
 कवतिकें जें जल्पे । तें साबलाहुनु रूपे ।
 विषाहुनु संकल्पें । मारकु जो ॥ ६१ ॥
 तेयातें बहू अज्ञान । अज्ञानाचें चि निधान ।
 हिंसेसि आयतन । जेयाचें जीणें ॥ ६२ ॥
 आणि फूंकें भाति फुगे । रेचिली सवें चि उफगे ।
 तैसा संयोगवियोगें । चढे वोहटे ॥ ६३ ॥
 पडिली वारेयाचा बलसां । धूलि चढे आकाशा ।
 हरिषा बलघे तैसा । स्तुतिवेलें ॥ ६४ ॥
 निंदा मोटकी आइके । आणि कपाल धरूनि ठाके ।
 धेंबें विरे वारेनि शोके । चिखलु जैसा ॥ ६५ ॥
 तैसा मानापमानिं होये । जो कोणही उर्भा न साहे ।
 तेयाचां ठांडं आहे । अज्ञान पुरें ॥ ६६ ॥
 आणि जेयाचां मनिं गांठि । वरि मोकली वाचा दीठि ।
 आंगें मीतलें जीवें पाठि । भलेतेया दे ॥ ६७ ॥
 व्याधाचें चारा घालणें । तैसें प्रांजल जोगावणें ।
 चांगाचें अंतष्करणें । वीरू करी ॥ ६८ ॥
 गार सेवालें गुंडालली । कां निंबोली जैसी पीकली ।
 तैसी जेयाची भली । बाह्य क्रिया ॥ ६९ ॥
 अज्ञान तेयाचां ठांडं । ठेविलें असे पाहिं ।
 या बोळा आन नाहिं । सत्य मार्गें ॥ ७० ॥

आणि गुरुकुलें जो लाजे । गुरुभक्ती उभजे ।
 विद्या घेउनु माजे । गुरुसी चि ॥ ७१ ॥
 तेयाचें नावं घेणें । तें वाचेसि शूद्रान होणें ।
 परि घडलें लक्षणें । बोलतां इयें ॥ ७२ ॥
 आतां गुरुभक्ताचें नावं घेऊं । तें चि वाचेसि प्रायश्चित्त देऊं ।
 गुरुसेवकु पाहों । सूर्य हा ॥ ७३ ॥
 एतुलेनि लागु पापाचा । निस्तैल हे वाचा ।
 जो गुरुलोपकाचा । पापि घडला ॥ ७४ ॥
 हा ठाऊं वरि । तेया नावांचें भय हरी ।
 मग ह्मणे अवधारीं । आणिकें चिन्हें ॥ ७५ ॥
 आंगें कर्मा ढीला । जो मनें विकल्पें भरला ।
 अडविचा अवगलला । कुहा जैसा ॥ ७६ ॥
 तेया तोंडिं कांटियडें । आंतु नमुदिं हाडें ।
 अशुचि तेणें पाडें । सबाहु जो ॥ ७७ ॥
 जैसें पोट पोसी सुणें । उघडें झांकलें न ह्मणे ।
 तैसें आपुलें परावें नेणे । द्रव्या लागि ॥ ७८ ॥
 या ग्रामकोलाचां ठाडें । जैसा मिलणीं ठाऊं नाहिं ।
 तैसा स्त्रीविषडें कांहिं । विचारीना ॥ ७९ ॥
 कर्माचा वेलु चूके । कां नित्यनैमित्यक ठाके ।
 तें जेया न दूखे । जीवा माझि ॥ ८० ॥
 पापि जो निसुगु । पुण्य अति निलागु ।
 जेयाचा मनिं वेगु । विकल्पाचा ॥ ८१ ॥
 तो जाण निखला । अज्ञानाचा पूतला ।
 जो बांधौनि असे ढोलां । विन्यासार्ते ॥ ८२ ॥
 आणि स्वार्थें अलुमालें । जो धीरापासौनि चले ।
 जैसें तृणबीज बलें । मुंगियेचेनि ॥ ८३ ॥

पावो सूदलेया सवें । थिल्लर जैसें कालवे ।
 तैसें भयाचेनि नावें । गजबजे जो ८४ ॥
 वायुचेनि अनुवायें । धूं दिगंत वेन्हीं जाये ।
 दुःखवार्त्ता होये । तैसें जेया ॥ ८५ ॥
 मनोरथांचा धारसां । वाहवणें जेयाचेया मानसा ।
 पुरीं पडला जैसा । दूधिया कां ॥ ८६ ॥
 वाउधणाचिया परी । जो आश्रयो केहीं न धरी ।
 क्षेत्रिं तीर्थीं पुरीं । थारों नेणे ॥ ८७ ॥
 मातलेया सरडा । पुडुतिं बूढ पुडुतीं सेंडा ।
 हिंडणवारा कोरडा । तैसा जेया ॥ ८८ ॥
 जैसा रोविलेयां उणें । रांजणु बैसां नेणे ।
 तैसा पडे तरि राहाणें । यन्हविं हींडे ॥ ८९ ॥
 तेयाचां ठांडं उदंड । अज्ञान असे उघड ।
 जो चांचल्यें भावंड । मर्कटाचें ॥ ९० ॥
 आणि पै धनुर्द्धरा । जेयाचेया अंतरा ।
 नाहिं वोढा बारा । संयमाचा ॥ ९१ ॥
 लेंडिये आला लोंढा । न मनीं वालुवेचा वरंडा ।
 तैसा निपेधाचेया तोंडा । भिये ना जो ॥ ९२ ॥
 व्रतातें आडमोडी । धर्माचे पाये उपडी ।
 नियमाची आश तोडी । जेयाची क्रिया ॥ ९३ ॥
 नाहिं पापाचा कांटाला । नेंदी पुण्यासि जीवाला ।
 लाजेचा पेंडवला । खणौनि घाली ॥ ९४ ॥
 कुलेंसि पाठिमोरा । वेदाज्ञेसि दुन्हा ।
 कृत्याकृत्यव्यापारा । निवाडु नेणे ॥ ९५ ॥
 वसो जैसा मोकटु । वारा जैसा अफाटु ।
 फूटला जैसा पाटु । निरंजनीं ॥ ९६ ॥

आंधलें हातिरं मातलें । कां डोंगरि जैसें पेटलें ।
 तैसें विषइं लगलें । चित्त जेयाचें ॥ ९७ ॥
 पै उघडा काय न पडे । मोकाटु कोणां नांतुडे ।
 गावंदारिचें आडें । नोलांडी कवण ॥ ९८ ॥
 जैसें सत्रीं अन्न जालें । कां सामान्या बीक आलें ।
 वाणसिये उभलें । कोण न रिगे ॥ ९९ ॥
 तैसें जेयाचें अंतःकरण । तेयाचां ठाईं संपूर्ण ।
 अज्ञानाची जाण । रिद्धि असे ॥ १०० ॥
 आणि विषयांची गोडी । जो जीत मेला न संडी ।
 स्वर्गिं हिं खावेया जोडि । येथौनि चि ॥ १ ॥
 जो अखंड भोगा जचे । जेया व्यसन कामक्रियेचें ।
 मुख देखौनि बिरक्ताचें । सचैल करी ॥ २ ॥
 विषो शीणौनि जाए । पारि न सिणे सावधु नोहे ।
 जेणें कुहिला हातें चि खाये । कोढी जैसा ॥ ३ ॥
 खरी टेंकों नेंदी उडे । लातौनि फोडी नाकाडें ।
 तन्ही जैसा न कडे । माघौता खरु ॥ ४ ॥
 तैसा जो विषयां लागि । घाली जलतिये आगी ।
 व्यसनार्चि आंगिं । लेणिं मिरवी ॥ ५ ॥
 ऋतौनि पडे तवं । मृगु वाढवी हांव ।
 पारि न ह्मणे माव । रोहिणीची ॥ ६ ॥
 तैसा जन्मौनि मृत्यु वेन्हीं । विषइं त्रासितां बड्ड इं परीं ।
 पारि त्रासु नेवे घरी । अधिक प्रेम ॥ ७ ॥
 पाहिलिये बालदशे । आई वा हें चि पिसें ।
 तें सरे मग स्त्रीमांसें । भुलौनि ठाके ॥ ८ ॥
 मग स्त्री भोगितां थावों । वृद्धाप्यें लागे नेउं ।
 मग तो चि प्रेमभाउं । बालकां आणी ॥ ९ ॥

आंधलें वियालें जैसैं । तैसिं बालकें परिवसे ।
 पारि जिये तब न त्रासे । विषयांसि जो ॥ ७१० ॥
 जाण तेयाचां टांडं । अज्ञानासि पारु नाहिं ।
 आतां आणिकें हिं । चिन्हें सांघों ॥ ११ ॥
 तरि देह हें आत्मा । ऐसेया जो मनोधर्मा ।
 वलघौनियां कर्मा । रंभ करी ॥ १२ ॥
 आणि उणें कां पुरें । जें जें काहिं आचर ।
 तेयाचेनि आविष्कारें । कुंधों लागे ॥ १३ ॥
 डोइये ठेविलेनि भोजें । देवलविसें फुंजें ।
 तैसा विद्यावयमाजें । उताणा चाले ॥ १४ ॥
 ह्मणे मीं चि येकु आथि । माझां चि वरिं संपत्ति ।
 माझी आचरती रीती । कोणहासि नाहि ॥ १५ ॥
 नाहिं माझेनि पाडें वाडु । मी चि सर्वजु एकु रूढ ।
 ऐसा शिवमुष्टिगंडु । घेउनु ठाके ॥ १६ ॥
 व्याधिलेया माणसा । न ये भोगु दाखउं जैसा ।
 नीके न साहे तैसा । पुढिलाचें ॥ १७ ॥
 पै गुण तेतुला खाण । स्नेहें किं जलतु जाए ।
 जेथ ठेविजे तेथ होए । मसी ऐसा ॥ १८ ॥
 जीवनें तिडिपिडि । बीजिला प्राणु फेडी ।
 लागला तरि काडी । उरों नेंदी ॥ १९ ॥
 अलुमालु प्रकाशु करी । तेतुलेनि उबारा धरी ।
 तेया दीपाचेया परी । सुविद्यु जो ॥ ७२० ॥
 बोखदाचेनि नाथें अमृतें । जैसा नवज्वरु आवुथे ।
 कां विख चि हांडनि परते । सापा दूध ॥ २१ ॥
 तैसा सद्गुणि मत्सरु । विपत्तिअहंकारु ।
 तपें ज्ञानें अपारु । ताठा चढे ॥ २२ ॥



भाषार्थदीपिका

अंत्यु राणिवे बेसला । कां आरें धारणु गीलिला ।
 तैसा गवें फ़गला । देखसी जो ॥ २३ ॥
 जो लाठी ऐसा न लवे । पाथरु तैसा न दवे ।
 गुण्यांसि नांगवे । फोडसें जेवि ॥ २४ ॥
 किंबहुना तेया पासि । अज्ञान आहे वाढिसि ।
 हें निकरें गा तुजसि । बोलत असों ॥ २५ ॥
 आणि पै धनंजया । जो देहगेहसामग्रिया ।
 नेदखे चि कालिचेया । जन्मातें गा ॥ २६ ॥
 कृतघ्ना उपेगु केला । चोरा वेव्हारु दीधला ।
 निमुगु अस्ताविला । विसरे जेवि ॥ २७ ॥
 वोढालिवां लाइलें । तैसें कान पूंस वोलें ।
 पुडुति वोढाळ् आलें । मुणें जेवि ॥ २८ ॥
 बेडुकु सापाचां तोंडि । जातसे सवडबुडी ।
 तो मशकाचिया जोडी । स्मरे चि ना ॥ २९ ॥
 तैसीं नवे द्वारें श्रवति । देहाची तूति जीति ।
 जेणें जाली तें चित्ती । सले ना जेया ॥ ३० ॥
 मातृकोदरकुहरि । सूनि त्रिष्टिचां दारि ।
 जठरिं नव मास वेव्हरीं । उकटला जें ॥ ३१ ॥
 ते गर्भिची व्यथा । कां जे जाली उपजतां ।
 तें काहिं चि सर्वथा । नाठवी जो ॥ ३२ ॥
 मलमूत्रपंक्ति । लोलतें बालकें अंकि ।
 देखीनि जो न थूकी । त्रामु नेवे ॥ ३३ ॥
 कले चि ना जन्म गेलें । पाहे चि ना पुडुति आलें ।
 ऐसेसें वाटलें । नाहिं जेया ॥ ३४ ॥
 आणि पै तिया चि परी । जीविताची फरारी ।
 देखीनि जो न करी । मृत्युचिंता ॥ ३५ ॥